

ओं नमः परमात्मने, श्री महागणपतये नमः,
श्री गुरुभ्यो नमः, हरिः ओं
—

कृष्ण यजुर्वेदीय तैत्तिरीय संहिता पद पाठः
(वाक्य सहित)

पञ्चमकाण्डे द्वितीयः प्रश्नः

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in

Table of Contents

5 कृष्ण यजुर्वेदीय तैत्तिरीय संहितायां पद पाठे पञ्चमं काण्डं	3
-----------------------------------------------------------------	---

5.2 पञ्चमकाण्डे द्वितीयः प्रश्नः – चित्युपक्रमाभिधानं...	3
----------------------------------------------------------	---

ओं नमः परमात्मने, श्री महागणपतये नमः,

श्री गुरुभ्यो नमः , हरिः ओं

5 कृष्ण यजुर्वेदीय तैत्तिरीय संहितायां पद पाठे पञ्चमं काण्डं

5.2 पञ्चमकाण्डे द्वितीयः प्रश्नः – चित्युपक्रमाभिधानं

5.2.1.1

विष्णु॑मुखा॒ वै दे॒वाः छन्दो॑भिरि॒मान् लो॒कान॑नपजय्य म॒भ्यज॑यन्
यद्-विष्णु॑क्र॒मान् क्रम॑ते विष्णु॑रेव भू॒त्वा यज॑मानः छन्दो॑भिरि॒मान्
लो॒कान॑नपजय्यम॒भि जय॑ति विष्णोः॑ क्रमो॑ऽस्य-भिमातिहेत्याह
गाय॑त्री वै पृथि॒वी त्रैष्टु॑भमन्तरिक्षं जागती द्यौरानुष्टुभीर्दिशः
छन्दो॑भिरेवे॒मान् लो॒कान् यथा॑ पूर्वम॒भि जय॑ति प्रजापतिरग्निमसृजत
सोऽस्मात् सृष्टः॑ - [] 1

5.2.1.1 - Padam

विष्णु॑मुखा॑ इति॑ विष्णु॑ – मु॒खाः । वै । दे॒वाः । छन्दो॑भिरिति॑
छन्दः॑ – भिः । इ॒मान् । लो॒कान् । अन॒प॒ज॒य्यमि॒त्यन॒प – ज॒य्यम् ।
अभी॑ति । अज॒यन् । यत् । विष्णु॑क्र॒मानिति॑ विष्णु॑-क्र॒मान् । क्र॒मते ।
विष्णुः॑ । ए॒व । भू॒त्वा । यज॑मानः । छन्दो॑भिरिति॑ छन्दः॑ – भिः ।
इ॒मान् । लो॒कान् । अन॒प॒ज॒य्यमि॒त्यन॒प-ज॒य्यम् । अभी॑ति । ज॒यति ।
विष्णोः॑ । क्र॒मः । अ॒सि । अ॒भि॒मा॒तिहे॒त्यभि॒मा॒ति-हा । इति॑ । आ॒ह ।
गा॒य॒त्री । वै । पृ॒थि॒वी । त्रै॒ष्टु॒भम् । अ॒न्त॒रि॒क्षम् । जा॒गती । द्यौः ।
आ॒नु॒ष्टु॒भीरि॒त्यानु॑ – स्तु॒भीः । दि॒शः । छन्दो॑भिरिति॑ छन्दः॑ – भिः ।
ए॒व । इ॒मान् । लो॒कान् । य॒थापू॒र्वमि॒ति यथा॑ – पू॒र्वम् । अभी॑ति ।
ज॒यति । प्र॒जाप॑तिरिति॑ प्र॒जा – प॒तिः । अ॒ग्निम् । अ॒सृ॒जत ।
सः । अ॒स्मात् । सृ॒ष्टः । 1 (50)

5.2.1.2

परा॑डै॒त् तमे॑तया ऽन्वै॒दक्र॑न्दति॒ति तया॑ वै सौ॒ऽग्नेः॑ प्रि॒यं धा॒माऽवा॑रु॒न्ध
यदे॒ताम॑न्वाहा-ग्ने॒रेवै॑तया प्रि॒यं धा॒माऽव॑ रु॒न्ध ई॒श्वरो॑ वा ए॒ष परा॑ड्

प्र॒द॒घो॒ यो॒ वि॒ष्णु॒क्र॒मा॒न् क्र॒म॒ते॒ च॒त॒सृ॒भि॒रा॒ वर्त॑ते॒ च॒त्वा॒रि॒ छ॒न्दा॒ँ॒सि॒
छ॒न्दा॒ँ॒सि॒ ख॒लु॒ वा॒ अ॒ग्नेः॒ प्रि॒या॒ त॒नूः॒ प्रि॒या॒मे॒वा॒स्य॒ त॒नु॒व॒म॒भि-[] 2

5.2.1.2 - Padam

प॒रा॒ङ् । ऐ॒त् । त॒म् । ए॒त॒या॑ । अ॒न्वि॒ति॑ । ऐ॒त् । अ॒क्र॒न्द॒त् । इति॑ ।
त॒या॑ । वै । सः । अ॒ग्नेः॒ । प्रि॒य॒म् । धा॒म॑ । अ॒वे॒ति॑ । अ॒रु॒न्ध॒ । य॒त् ।
ए॒ता॒म् । अ॒न्वा॒हे॒त्य॒नु-आ॒ह॑ । अ॒ग्नेः॒ । ए॒व । ए॒त॒या॑ । प्रि॒य॒म् । धा॒म॑ ।
अ॒वे॒ति॑ । रु॒न्धे॒ । ई॒श्व॒रः॒ । वै । ए॒षः॒ । प॒रा॒ङ् । प्र॒द॒घ॒ इति॑ प्र - द॒घः॒ ।
यः । वि॒ष्णु॒क्र॒मा॒निति॑ वि॒ष्णु॒ - क्र॒मा॒न् । क्र॒म॒ते॒ । च॒त॒सृ॒भि॒रिति॑
च॒त॒सृ॒ - भिः॒ । ए॒ति॑ । वर्त॑ते॒ । च॒त्वा॒रि॒ । छ॒न्दा॒ँ॒सि॒ । छ॒न्दा॒ँ॒सि॒ ।
ख॒लु॒ । वै । अ॒ग्नेः॒ । प्रि॒या॒ । त॒नूः॒ । प्रि॒या॒म् । ए॒व । अ॒स्य॒ ।
त॒नु॒व॒म् । अ॒भी॒ति॑ । 2 (50)

5.2.1.3

प॒र्या॒व॒र्त॑ते॒ दक्षि॑णा॒ प॒र्या॒व॒र्त॑ते॒ स्व॒मे॒व॒ वी॒र्य॑म॒नु॒ प॒र्या॒व॒र्त॑ते॒ तस्मा॑द्-
दक्षि॑णोऽर्ध॒ आ॒त्म॒नो॒ वी॒र्या॑व॒त्त॒रोऽथो॑ आ॒दि॒त्य॒स्यै॒वाऽऽ*वृ॒त॒म॒नु॒ प॒र्या॒व॒र्त॑ते॒
शु॒नः॒ शो॒प॒मा॒जी॒ग॒र्ति॑ व॒रु॒णोऽगृ॑ह्णा॒त् स॒ ए॒तां॑ वा॒रु॒णी॒मप॑श्य॒त् त॒या॒ वै

स आत्मानं वरुणपाशादमुञ्चद्-वरुणो वा एतं गृह्णाति य उखां
प्रतिमुञ्चत उदुत्तमं वरुणपाश-मस्मदित्याहा-ऽऽ*त्मानमेवैतया-[] 3

5.2.1.3 - Padam

पर्यावर्तत इति परि – आवर्तते । दक्षिणा । पर्यावर्तत इति
परि – आवर्तते । स्वम् । एव । वीर्यम् । अन्विति । पर्यावर्तत इति
परि – आवर्तते । तस्मात् । दक्षिणः । अर्धः । आत्मनः । वीर्यावत्तर
इति वीर्यावत् – तरः । अथो इति । आदित्यस्य । एव ।
आवृतमित्या – वृतम् । अन्विति । पर्यावर्तत इति परि – आवर्तते ।
शुनः शोपम् । आजीगर्तिम् । वरुणः । अगृह्णात् । सः । एताम् ।
वारुणीम् । अपश्यत् । तया । वै । सः । आत्मानम् । वरुणपाशादिति
वरुण – पाशात् । अमुञ्चत् । वरुणः । वै । एतम् । गृह्णाति । यः ।
उखाम् । प्रतिमुञ्चत इति प्रति – मुञ्चते । उदिति ।
उत्तममित्युत् – तमम् । वरुण । पाशम् । अस्मत् । इति । आह ।
आत्मानम् । एव । एतया । 3 (50)

5.2.1.4

वरुणपाशान् मुञ्चत्या त्वाऽहार्षमित्याहा ऽऽह्येन॑ हरति ध्रुवस्तिष्ठा
ऽविचाचलिरित्याह प्रतिष्ठित्यै विशस्त्वा सर्वा वाञ्छन्त्वित्याह विशैवैन॑
समर्धयत्यस्मिन् राष्ट्रमधि श्रयेत्याह राष्ट्रमेवास्मिन् ध्रुवमक॑र्यं कामयेत
राष्ट्रं॑ स्यादिति तं मनसा ध्यायेद्-राष्ट्रमेव भवत्य- [] 4

5.2.1.4 - Padam

वरुणपाशादिति वरुण-पाशात् । मुञ्चति । एति । त्वा । अहार्षम् ।
इति । आह । एति । हि । एनम् । हरति । ध्रुवः । तिष्ठ ।
अविचाचलिरित्यवि - चाचलिः । इति । आह । प्रतिष्ठित्या इति
प्रति - स्थित्यै । विशः । त्वा । सर्वाः । वाञ्छन्तु । इति । आह ।
विशा । एव । एनम् । समिति । अर्धयति । अस्मिन् । राष्ट्रम् ।
अधीति । श्रय । इति । आह । राष्ट्रम् । एव । अस्मिन् । ध्रुवम् ।
अकः । यम् । कामयेत । राष्ट्रम् । स्यात् । इति । तम् । मनसा ।
ध्यायेत् । राष्ट्रम् । एव । भवति । 4 (50)

5.2.1.5

अ॒ग्रे॑ बृ॒हन्नु॑ष॒सामू॒र्ध्वो॑ अ॒स्थादि॑त्याहाऽग्र॒मेवै॑न॒ऽस॒माना॑नां करोति
नि॒र्जग्मि॑वान् तम॒स इ॒त्याह॑ तम॒ एवा॒स्माद॑प॒ हन्ति॑ ज्योति॒षा-
ऽऽगा॑दि॒त्याह॑ ज्योति॒रेवा॒-स्मिन् द॑धाति चत॒सृभिः॑ सादयति च॒त्वारि॑
छन्दा॑ऽसि छन्दो॑भिरि॒वाऽ-ति॑च्छन्दसो॒त्तम॑या वर्ष॒र्ष वा॑ ए॒षा छन्द॑सां
य॒दति॑च्छन्दा वर्ष॒र्षेवै॑न॒ऽस॒माना॑नां करोति स॒द्वती॑ - [] 5

5.2.1.5 - Padam

अ॒ग्रे॑ । बृ॒हन् । उ॒ष॒साम् । ऊ॒र्ध्वः । अ॒स्थात् । इति॑ । आ॒ह । अ॒ग्रम् ।
ए॒व । ए॒नम् । स॒मा॒ना॒नाम् । करोति॑ । नि॒र्जग्मि॑वानिति॒ निः-जग्मि॑वान् ।
तम॒सः । इति॑ । आ॒ह । तमः॑ । ए॒व । अ॒स्मात् । अपेति॑ । ह॒न्ति ।
ज्योति॑षा । एति॑ । अ॒गात् । इति॑ । आ॒ह । ज्योतिः॑ । ए॒व । अ॒स्मिन् ।
द॒धाति॑ । चत॒सृभिरिति॑ चत॒सृ - भिः॑ । सादयति॑ । च॒त्वारि॑ ।
छन्दा॑ऽसि । छन्दो॑भिरिति॒ छन्दः॑ - भिः॑ । ए॒व ।
अति॑च्छन्दसेत्यति॑ - छन्द॒सा । उत्त॑मयेत्युत् - तम॒या । वर्ष॑र्ष । वै ।

ए॒षा । छ॒न्द॒साम् । यत् । अ॒ति॒च्छ॒न्दा इत्य॑ति – छ॒न्दाः । व॒र्ष्म । ए॒व ।
ए॒नम् । स॒मा॒ना॒नाम् । क॒रो॒ति । स॒द्व॒तीति॑ सत् – व॒ती । 5 (50)

5.2.1.6

भ॒व॒ति स॒त्त्वमे॒वैनं॑ ग॒म॒य॒ति वा॒थ्स॒प्रेणो॑प॒ तिष्ठ॑त ए॒तेन॑ वै
व॒थ्स॒प्री॒र्भा॒ल॒न्दनो॑ऽग्नेः प्रि॒यं धा॒माऽवा॑रु॒न्धाऽग्ने॑रे॒वैतेन॑ प्रि॒यं धा॒माऽव॑
रु॒न्ध ए॒का॒द॒शं भ॒व॒त्येक॑धै॒व यज॑मा॒ने वी॒र्यं॑ द॒धा॒ति स्तो॒मेन॑ वै दे॒वा
अ॒स्मिन् लो॒क आ॑र्धु॒वन् छ॒न्दो॑भि॒रमु॒ष्मिन् स्तो॒मस्ये॒व खलु॑ वा
ए॒तद्-रूपं॑ य॒द्-वा॒थ्स॒प्रं य॒द्-वा॒थ्स॒प्रेणो॑प॒ तिष्ठ॑त- [] 6

5.2.1.6 - Padam

भ॒व॒ति । स॒त्त्वमि॑ति सत् – त्वम् । ए॒व । ए॒नम् । ग॒म॒य॒ति ।
वा॒थ्स॒प्रेणो॑ति वा॒थ्स – प्रे॒ण । उ॒पेति॑ । तिष्ठ॑ते । ए॒तेन॑ । वै ।
व॒थ्स॒प्री॒रिति॑ व॒थ्स – प्रीः । भा॒ल॒न्दनः॑ । अ॒ग्नेः । प्रि॒यम् । धा॒म ।
अ॒वेति॑ । अ॒रु॒न्ध । अ॒ग्नेः । ए॒व । ए॒तेन॑ । प्रि॒यम् । धा॒म । अ॒वेति॑ ।
रु॒न्धे । ए॒का॒द॒शम् । भ॒व॒ति । ए॒क॒धैत्ये॑क – धा । ए॒व । यज॑मा॒ने ।
वी॒र्यम् । द॒धा॒ति । स्तो॒मेन॑ । वै । दे॒वाः । अ॒स्मिन् । लो॒के ।

आ॒ध॒र्नु॒व॒न् । छ॒न्दो॑भि॒रिति॑ छ॒न्दः॑ – भिः॑ । अ॒मुष्मि॑न् । स्तो॒मस्य॑ ।
इ॒व । ख॒लु । वै । ए॒तत् । रू॒पम् । यत् । वा॒थ्सप्र॑मि॒ति वा॒थ्स-प्रम् ।
यत् । वा॒थ्सप्र॑णे॒ति वा॒थ्स-प्र॑ण । उ॒पति॑ष्ठत इ॒त्युप॑-तिष्ठते । 6 (50)

5.2.1.7

इ॒ममे॒व ते॒न लो॒कम॒भि ज॑यति यद्-विष्णु॑क्र॒मान् क्र॑मतेऽमु॒मेव
तैर्लो॒कम॒भि ज॑यति पूर्वे॒द्युः प्र॑क्रामत्यु॒त्तरे॒द्युरु॑प तिष्ठते तस्मा॒द्-
यो॒गेऽन्या॑सां प्र॒जानां॑ मनः॒ क्षेमे॑ऽन्या॑सां तस्मा॒द्-या॒याव॑रः क्षे॒म्यस्ये॑शे
तस्मा॒द्-या॒याव॑रः क्षे॒म्यम॑ध्यवस्यति मु॒ष्टी क॑रोति वाचं॑ यच्छति
य॒ज्ञस्य॑ धृ॒त्यै । 7

5.2.1.7 - Padam

इ॒मम् । ए॒व । ते॒न । लो॒कम् । अ॒भीति॑ । ज॒यति॑ । यत् ।
वि॒ष्णु॒क्र॒मा॒निति॑ विष्णु – क्र॒मान् । क्र॑मते । अ॒मुम् । ए॒व । तैः ।
लो॒कम् । अ॒भीति॑ । ज॒यति॑ । पूर्वे॒द्युः । प्रे॒ति । क्र॑मति । उ॒त्तरे॒द्युः ।
उ॒पेति॑ । तिष्ठ॑ते । तस्मा॒त् । यो॒गे । अ॒न्या॑साम् । प्र॒जाना॑मिति
प्र – जा॒नाम् । मनः॑ । क्षे॒मे । अ॒न्या॑साम् । तस्मा॒त् । या॒याव॑रः ।

क्षेम्यस्य॑ । ई॒शो॑ । तस्मा॑त् । या॒यावरः॑ । क्षेम्य॑म् । अ॒ध्यव॑स्यतीत्यधि॑
– अव॑स्यति । मु॒ष्टी इति॑ । क॒रोति॑ । वाच॑म् । य॒च्छति॑ । य॒ज्ञस्य॑ ।
धृ॒त्यै॑ । 7 (42) (सृ॒ष्टोऽ – (1) भ्ये॑ – तया॑ – भव॑ति – स॒द्वत्यु॑ –
पति॑ष्ठते – द्वि॒चत्वारि॑ञ्शच्च) (A1)

5.2.2.1

अ॒न्नप॑तेऽन्नस्य॑ नो दे॒हीत्या॑हा-ग्नि॒र्वा अ॒न्नप॑तिः स ए॒वास्मा॑ अ॒न्नं
प्र॒यच्छ॑त्यन॒मीव॑स्य शु॒ष्मिण॑ इत्या॒हा-य॒क्ष्मस्ये॑ति वावै॒तदा॑ह प्र प्र॒दाता॑रं
ता॒रिष॑ ऊ॒र्जं नो॑ धे॒हि द्वि॒पदे॑ चतु॒ष्पद॑ इत्या॒हाऽऽ*शि॒षमे॑वैता॒मा शा॑स्त
उ॒दु त्वा॑ वि॒श्वे दे॒वा इत्या॑ह प्रा॒णा वै वि॒श्वे दे॒वाः- [] 8

5.2.2.1 - Padam

अ॒न्नप॑त इत्य॒न्न – प॑ते । अ॒न्नस्य॑ । नः॑ । दे॒हि । इति॑ । आ॒ह ।
अ॒ग्निः । वै । अ॒न्नप॑तिरित्य॒न्न – प॑तिः । सः॑ । ए॒व । अ॒स्मै ।
अ॒न्नम् । प्रेति॑ । य॒च्छति॑ । अ॒नमी॑वस्य शु॒ष्मिणः॑ । इति॑ । आ॒ह ।
अ॒यक्ष्म॑स्य । इति॑ । वा॒व । ए॒तत् । आ॒ह । प्रेति॑ । प्र॒दाता॑रमिति॑
प्र – दा॒ता॒रम् । ता॒रिषः॑ । ऊ॒र्जम् । नः॑ । धे॒हि ।

द्वि॒पद॑ इति॑ द्वि॑ – पदे॑ । चतु॑ष्पद॑ इति॑ चतुः॑ – पदे॑ । इति॑ । आह॑ ।
आ॒शि॒ष॒मि॒त्या॑ – शि॒ष॒म् । ए॒व । ए॒ता॒म् । ए॒ति॑ । शा॒स्त्रे॑ । उ॒दि॒ति॑ ।
उ॒ । त्वा॒ । वि॒श्वे॑ । दे॒वाः । इति॑ । आह॑ । प्रा॒णा इति॑ प्र॒-अ॒नाः । वै ।
वि॒श्वे॑ । दे॒वाः । 8 (50)

5.2.2.2

प्रा॒णै॒रे॒वैन॑मु॒द्यच्छ॑ते अ॒ग्ने॑ भ॒रन्तु॑ चि॒त्ति॒भि॒रि॒त्याह॑ यस्मा॑ ए॒वैनं॑
चि॒त्ता॒यो॒द्यच्छ॑ते ते॒नै॒वैन॑ सम॒र्धय॑ति च॒त॒सृ॒भि॒रा सा॑द॒यति॑ च॒त्वारि॑
छ॒न्दा॒सि॒ छ॒न्दो॒भि॒रे॒वा-ति॑च्छ॒न्दसो॑त्त॒मया॑ वर्ष्म॑ वा ए॒षा छ॒न्द॒सां
य॑दति॒च्छ॒न्दा वर्ष्मै॑वैन॑ सम॒ाना॑नां करोति॑ स॒द्वती॑ भ॒वति॑
स॒त्त्वमे॒वैनं॑ ग॒मय॑ति प्रे॒द॒ग्ने॑ ज्योति॒ष्मान्- [] 9

5.2.2.2 - Padam

प्रा॒णै॒रि॒ति प्र॑ – अ॒नैः॑ । ए॒व । ए॒न॒म् । उ॒दि॒ति॑ । य॒च्छ॑ते । अ॒ग्ने॑ ।
भ॒रन्तु॑ । चि॒त्ति॒भि॒रि॒ति चि॒त्ति॑ – भिः॑ । इति॑ । आह॑ । यस्मै॑ । ए॒व ।
ए॒न॒म् । चि॒त्ता॒य । उ॒द्यच्छ॑त इत्यु॒त् – य॒च्छ॑ते । ते॒न । ए॒व । ए॒न॒म् ।
स॒मि॒ति॑ । अ॒र्ध॒य॑ति । च॒त॒सृ॒भि॒रि॒ति च॒त॒सृ॑ – भिः॑ । ए॒ति॑ । सा॑द॒यति॑ ।

च॒त्वारि॑ । छ॒न्दा॑ꣳसि । छ॒न्दो॑भिरिति॑ छ॒न्दः॑ – भिः॑ । ए॒व ।
अति॑च्छ॒न्दसे॑त्यति॑ – छ॒न्दसा॑ । उत्त॑मयेत्युत् – त॒मया॑ ॥ वर्ष्म॑ । वै ।
ए॒षा । छ॒न्दसाम् । यत् । अति॑च्छ॒न्दा इत्यति॑ – छ॒न्दाः॑ । वर्ष्म॑ । ए॒व ।
ए॒नम् । स॒माना॑नाम् ॥ क॒रोति॑ । स॒द्वती॑ति सत् – व॒ती । भ॒वति॑ ।
स॒त्त्वमि॑ति सत्-त्वम् । ए॒व । ए॒नम् । ग॒मय॑ति । प्रेति॑ । इत् । अ॒ग्ने ।
ज्योति॑ष्मान् । 9 (50)

5.2.2.3

या॒हीत्या॑ह ज्योति॑रे॒वास्मिन्॑ दधाति॑ त॒नुवा॑ वा ए॒ष हि॑नस्ति यꣳ
हि॑नस्ति मा हिꣳसी॒स्तनु॑वा ॥ प्र॒जा इत्या॑ह प्र॒जाभ्य॑ ए॒वैनꣳ श॑मयति
रक्षाꣳसि॑ वा ए॒तद्-यज्ञꣳ स॑चन्ते॑ य॒दन॑ उ॒त्सर्ज॑-त्य॒क्रन्द॑दित्यन्वा॒ह
रक्षा॑साम॒पह॑त्या अ॒नसा॑ व॒हन्-त्य॑प॒चिति॑-मे॒वास्मिन्॑ दधाति॑
तस्मा॑दन॒स्वी च॑ र॒थी चा॑तिथी॒ना-म॑प॒चित॑त॒मा – [] 10

5.2.2.3 - Padam

या॒हि । इति॑ । आ॒ह । ज्योतिः॑ । ए॒व । अ॒स्मिन् । दधा॑ति । त॒नुवा॑ ॥
वै । ए॒षः । हि॑नस्ति । यम् । हि॑नस्ति । मा । हिꣳसीः । त॒नुवा॑ ॥

प्र॒जा इति॑ प्र – जाः । इति॑ । आ॒ह । प्र॒जाभ्य॑ इति॑ प्र – जाभ्यः॑ ।
ए॒व । ए॒नम् । श॒मय॑ति । र॒क्षा॒सि । वै । ए॒तत् । य॒ज्ञम् । स॒चन्ते॑ ।
यत् । अ॒नः । उ॒त्स॒र्ज॒तीत्यु॑त् – स॒र्ज॒ति । अ॒क्र॒न्दत् । इति॑ । अ॒न्वि॒ति ।
आ॒ह । र॒क्ष॒साम् । अ॒प॒ह॒त्या इत्य॑प – ह॒त्यै । अ॒न॒सा । व॒ह॒न्ति ।
अ॒प॒चि॒ति॒मि॒त्य॑प – चि॒तिम् । ए॒व । अ॒स्मि॒न् । द॒धा॒ति । त॒स्मात् ॥
अ॒न॒स्वी । च । र॒थी । च । अ॒ति॒थी॒नाम् ।
अ॒प॒चि॒त॒त॒मा॒वि॒त्य॑प॒चि॒त – त॒मौ । 10 (50)

5.2.2.4

व॒प॒चि॒ति॒मा॒न् भ॒व॒ति य॒ एवं॑ वै॒द॒ स॒मि॒धा॒ऽग्निं॑ दु॒व॒स्य॑तेति॑
घृ॒ता॒नु॒षि॒क्ता॒म॒व॒सि॒ते स॒मि॒ध॒मा द॒धा॒ति य॒था॒ऽति॒थ॒य आ॒ग॒ता॒य
स॒र्पि॒ष्व॒दा॒ति॒थ्यं॑ क्रि॒य॒ते ता॒दृ॒गे॒व तद्-गा॒य॒त्रि॒या ब्रा॒ह्म॒ण॒स्य गा॒य॒त्रो हि
ब्रा॒ह्म॒ण॒स्त्रि॒ष्टु॒भा रा॒ज॒न्य॒स्य त्रै॒ष्टु॒भो हि रा॒ज॒न्यो॑ ऽप्सु॒ भ॒स्म प्र
वै॒श॒य॒त्य॒प्सु॒यो॒नि॒र्वा अ॒ग्निः॒ स्वा॒मे॒वैनं॑ यो॒निं ग॒म॒य॒ति ति॒सृ॒भिः
प्र॒वै॒श॒य॒ति त्रि॒वृ॒द्वा – [] 11

5.2.2.4 - Padam

अप॑चिति॒मानि॒त्यप॑चिति – मान् । भव॑ति । यः । ए॒वम् । वे॒द ।
स॒मिधे॑ति॒ सं – इ॒धा॑ । अ॒ग्निम् । दु॒वस्य॑त । इति॑ । घृ॒तानु॑षि॒क्तामि॑ति
घृ॒त – अ॒नुषि॑क्ताम् । अ॒वसि॑त इत्य॒व – सि॑ते । स॒मिध॑मि॒ति
सं – इ॒धम् । ए॒ति । द॒धाति॑ । यथा॑ । अ॒तिथ॑ये । आ॒गता॑येत्या
– ग॒ताय॑ । सर्पि॑ष्वत् । आ॒तिथ्य॑म् । क्रि॒यते॑ । ता॒दृक् । ए॒व । तत् ।
गा॒यत्रि॑या । ब्रा॒ह्मण॑स्य । गा॒यत्रः॑ । हि । ब्रा॒ह्मणः॑ । त्रि॒ष्टुभा॑ ।
रा॒ज॒न्यस्य॑ । त्रै॒ष्टुभः॑ । हि । रा॒ज॒न्यः॑ । अ॒प्सि॒स्वत्य॑प्-सु । भ॒स्म ।
प्रे॒ति । वे॒शय॑ति । अ॒प्सु॒योनि॑रि॒तिय॑प्सु – यो॒निः । वै । अ॒ग्निः ।
स्वा॒म् । ए॒व । ए॒नम् । यो॒निम् । ग॒मय॑ति । ति॒सृभि॑रि॒ति ति॒सृ-भिः॑ ।
प्रे॒ति । वे॒शय॑ति । त्रि॒वृदि॑ति॒ त्रि – वृ॑त् । वै । 11 (50)

5.2.2.5

अ॒ग्नि-र्या॑वा॒नेवा॑ऽग्नि॒स्तं प्र॑ति॒ष्ठां ग॑मयति॒ परा॑ वा ए॒षोऽग्निं॑
व॑पति॒ योऽप्सु॑ भ॒स्म प्र॑वे॒शय॑ति॒ ज्योति॑ष्म॒तीभ्या॑-म॒व द॑धाति
ज्योति॑रे॒वाऽस्मिन्॑ द॒धाति॒ द्वाभ्यां॑ प्र॒तिष्ठि॑त्यै॒ परा॑ वा ए॒ष प्र॒जां प॒शून्

व॒पति॑ योऽ॒प्सु भ॒स्म प्र॒वेश॑यति पुन॒रूर्जा॑ सह॒ रय्ये॑ति पुन॒रुदै॑ति
प्र॒जामे॑व प॒शूना॑त्मन् ध॒त्ते पुन॑स्त्वाऽऽदि॒त्या- [] 12

5.2.2.5 - Padam

अ॒ग्निः । या॒वान् । ए॒व । अ॒ग्निः । तम् । प्र॒तिष्ठा॑मिति॒ प्रति॑ - स्था॒म् ।
ग॒मय॑ति । प॒रेति॑ । वै । ए॒षः । अ॒ग्निम् । व॒पति॑ । यः । अ॒प्स्वि॒त्यप्
- सु । भ॒स्म । प्र॒वेश॑यतीति॒ प्र - वे॑शयति । ज्योति॑ष्मती॒भ्याम् ।
अ॒वेति॑ । द॒धाति॑ । ज्योतिः॑ । ए॒व । अ॒स्मिन् । द॒धाति॑ । द्वा॒भ्याम् ।
प्र॒तिष्ठि॑त्या इति॒ प्रति॑ - स्थि॒त्यै । प॒रेति॑ । वै । ए॒षः । प्र॒जामि॑ति
प्र - जा॒म् । प॒शून् । व॒पति॑ । यः । अ॒प्स्वि॒त्यप् - सु । भ॒स्म ।
प्र॒वेश॑यतीति॒ प्र - वे॑शयति । पुनः॑ । ऊ॒र्जा । सह॒ । र॒य्या । इति॑ ।
पुनः॑ । उ॒दैती॑त्युत् - ऐति॑ । प्र॒जामि॑ति॒ प्र - जा॒म् । ए॒व । प॒शून् ।
आ॒त्मन् । ध॒त्ते । पुनः॑ । त्वा । आ॒दि॒त्याः । 12 (50)

5.2.2.6

रु॒द्रा व॑सवः॒ समि॑न्धता-मि॒त्याहै॑ता वा ए॒तं दे॒वता॑ अ॒ग्रे स॒मैन्ध॑त
ताभि॑रे॒वैन॑ꣳ समि॑न्धे बो॒धा स॒ बो॒धी॑त्युप तिष्ठते बो॒धय॑त्ये॒वैनं॑

तस्मा॑त् सु॒प्त्वा प्र॒जाः प्र॒बु॒ध्यन्ते॑ यथा॒स्थान॑मु॒प तिष्ठ॑ते तस्मा॑द्-
यथा॒स्थानं॑ प॒शवः॑ पुन॒रेत्यो॑प तिष्ठन्ते । 13

5.2.2.6 - Padam

रु॒द्राः । व॒सवः॑ । स॒मि॒ति । इ॒न्ध॒ताम् । इति॑ । आ॒ह । ए॒ताः । वै ।
ए॒तम् । दे॒वताः॑ । अ॒ग्ने । स॒मि॒ति । ऐ॒न्ध॒त । ता॒भिः । ए॒व । ए॒नम् ।
स॒मि॒ति । इ॒न्धे । बो॒ध । सः । बो॒धि । इति॑ । उ॒पेति॑ । तिष्ठ॑ते ।
बो॒धय॑ति । ए॒व । ए॒नम् । तस्मा॑त् । सु॒प्त्वा । प्र॒जा इति॑ प्र – जाः ।
प्रेति॑ । बु॒ध्यन्ते॑ । यथा॒स्थान॑मि॒ति यथा – स्थान॑म् । उ॒पेति॑ । तिष्ठ॑ते ।
तस्मा॑त् । यथा॒स्थान॑मि॒ति यथा – स्थान॑म् । प॒शवः॑ । पुनः॑ ।
ए॒त्येत्या॑ – इत्य॑ । उ॒पेति॑ । तिष्ठ॑न्ते । 13 (42)

(वै विश्वे॑ दे॒वा – ज्योति॑ष्मा – न॒प॒चित॑तमौ – त्रि॒वृ॒द्धा – आ॒दि॒त्या
– द्वि॒च॒त्वारि॑ंश॒च्च) (A2)

5.2.3.1

याव॑ती वै पृ॒थि॒वी तस्यै॑ य॒म आ॒धि॒प॒त्यं प॒री॒याय॑ यो वै य॒मं
दे॒वय॑जन॒मस्या॑ अ॒निर्या॑च्या॒ग्निं चि॑नुते य॒मायै॑ न॒ञ्

स चि॒नुते॑ऽपे॒ते-त्य॑ध्यवसाययति यममे॒व दे॒वय॑जनमस्यै॒ निर्या॑च्या-
ऽऽत्म॑ने॒ऽग्निं॑ चिनुत इ॒ष्वग्रे॑ण वा अस्या॒ अना॑मृत-मिच्छन्तो॒ नावि॑न्दन्
ते दे॒वा ए॒तद्-यजु॑रपश्यन्पे॒तेति॑ यदे॒तेना॑-ध्यवसाययत्य - [] 14

5.2.3.1 - Padam

याव॑ती । वै । पृ॒थि॒वी । तस्यै॑ । यमः॑ । आधि॑पत्यमित्याधि॑ - पत्यम् ।
परी॑ति । इ॒याय॑ । यः । वै । यमम् । दे॒वय॑जनमिति॑ दे॒व - य॑जनम् ।
अस्याः॑ । अनिर्या॑च्येत्यनिः - याच्य॑ । अ॒ग्निम् । चिनु॑ते । यमा॑य ।
ए॒नम् । सः । चिनु॑ते । अपे॑ति । इ॒त । इति॑ । अ॒ध्यव॑साययतीत्यधि॑ -
अव॑साययति । यमम् । ए॒व । दे॒वय॑जनमिति॑ दे॒व-य॑जनम् । अस्यै॑ ।
निर्या॑च्येति॑ निः - याच्य॑ । आ॒त्म॒ने॑ । अ॒ग्निम् । चिनु॑ते ।
इ॒ष्वग्रे॑णे॒तीषु॑ - अ॒ग्रेण॑ । वै । अस्याः॑ । अना॑मृतमित्यना॑ - मृ॒तम् ।
इच्छ॑न्तः । न । अ॒वि॒न्दन् । ते । दे॒वाः । ए॒तत् । यजुः॑ । अ॒प॒श्यन् ।
अपे॑ति । इ॒त । इति॑ । यत् । ए॒तेन॑ ।
अ॒ध्यव॑साययतीत्यधि॑ - अव॑साययति । 14 (50)

5.2.3.2

–नामृ॑त ए॒वाग्निं॑ चि॒नुत॑ उ॒द्धन्ति॑ यदे॒वास्या॑ अमे॒ध्यं तदप॑
हन्त्यपो॒ऽवोक्ष॑ति शान्त्यै॑ सि॒कता॑ नि व॒पत्ये॑तद्वा अ॒ग्नेर्वै॑श्वा॒नरस्य॑
रूपं॑ रूपेणै॒व वै॑श्वा॒नरम॑व रुन्ध ऊ॒षान् नि॒वप॑ति पु॒ष्टिर्वा ए॒षा
प्र॒जननं॑ यदू॒षाः पु॒ष्ट्यामे॒व प्र॒जनने॑ऽग्निं चि॒नुते॑ऽथो सं॒ज्ञान ए॒व
सं॒ज्ञानं॑ ह्येतत् – [] 15

5.2.3.2 - Padam

अना॑मृ॒त इत्य॑ना – मृ॒ते । ए॒व । अ॒ग्निम् । चि॒नुते॑ । उ॒दिति॑ । ह॒न्ति ।
यत् । ए॒व । अ॒स्याः । अमे॒ध्यम् । तत् । अपे॑ति । ह॒न्ति । अ॒पः ।
अवे॑ति । उ॒क्षति॑ । शान्त्यै॑ । सि॒कताः । नीति॑ । व॒पति॑ । ए॒तत् । वै ।
अ॒ग्नेः । वै॒श्वा॒नरस्य॑ । रू॒पम् । रू॒पेण॑ । ए॒व । वै॒श्वा॒नरम् । अवे॑ति ।
रुन्धे॑ । ऊ॒षान् । नीति॑ । व॒पति॑ । पु॒ष्टिः । वै । ए॒षा । प्र॒जनन॑मिति
प्र – जन॑नम् । यत् । ऊ॒षाः । पु॒ष्ट्याम् । ए॒व । प्र॒जनन॑ इति
प्र – जन॑ने । अ॒ग्निम् । चि॒नुते॑ । अथो॑ इति । सं॒ज्ञान इति॑
सं – ज्ञाने॑ । ए॒व । सं॒ज्ञान॑मिति सं–ज्ञान॑म् । हि । ए॒तत् । 15 (50)

5.2.3.3

प॒शूनां॑ य॒दूषा॑ द्या॒वापृ॑थि॒वी स॒हाऽऽस्तां॑ ते वि॒यती॑ अ॒ब्रूता॑मस्त्वे॒व नौ॑
स॒ह य॒ज्ञिय॑मि॒ति य॒दमु॑ष्या य॒ज्ञिय॑मासीत् तद॒स्याम॑दधात् त ऊ॒षा
अ॒भवन् य॒दस्या॑ य॒ज्ञिय॑मासीत् तद॒मुष्या॑मदधात् तददश्च॒न्द्रम॑सि
कृ॒ष्णमू॑षान् नि॒वप॑न्नदो ध्या॒येद् द्या॒वापृ॑थि॒व्योरे॒व य॒ज्ञिये॑ऽग्निं चि॒नुते॑
ऽयं॑ सो अ॒ग्निरि॑ति वि॒श्वामि॑त्रस्य – [] 16

5.2.3.3 - Padam

प॒शूना॑म् । यत् । ऊ॒षाः । द्या॒वापृ॑थि॒वी इति॑ द्या॒वा – पृ॑थि॒वी । स॒ह ।
आ॒स्ता॑म् । ते इति॑ । वि॒यती॑ इति॑ वि – यती॑ । अ॒ब्रूता॑म् । अस्तु॑ ।
ए॒व । नौ॑ । स॒ह । य॒ज्ञिय॑म् । इति॑ । यत् । अ॒मुष्याः॑ । य॒ज्ञिय॑म् ।
आसी॑त् । तत् । अ॒स्याम् । अ॒दधा॑त् । ते । ऊ॒षाः । अ॒भवन् ।
यत् । अ॒स्याः । य॒ज्ञिय॑म् । आसी॑त् । तत् । अ॒मुष्या॑म् । अ॒दधा॑त् ।
तत् । अ॒दः । च॒न्द्रम॑सि । कृ॒ष्णम् । ऊ॒षान् । नि॒वप॑न्निति॑ नि॒वप॑न् ।
अ॒दः । ध्या॒येत् । द्या॒वापृ॑थि॒व्योरि॑ति॑ द्या॒वा – पृ॑थि॒व्योः । ए॒व ।
य॒ज्ञिये॑ । अ॒ग्निम् । चि॒नुते॑ । अ॒यम् । सः । अ॒ग्निः । इति॑ ।

वि॒श्वा॒मि॒त्र॒स्ये॒ति॒ वि॒श्व – मि॒त्र॒स्य । 16 (50)

5.2.3.4

सू॒क्तं॑ भव॒त्ये॒तेन॑ वै वि॒श्वा॒मि॒त्रो॒ऽग्नेः॑ प्रि॒यं॒ धा॒मा ऽवा॒रु॒न्धा॒ग्ने॒रे॒वै॒तेन॑ प्रि॒यं
धा॒माव॑ रु॒न्धे छ॒न्दो॑भि॒र्वै दे॒वाः सु॒वर्गं॑ लो॒क॒मा॒यन् च॒त॒स्रः प्रा॒चीरु॒प
द॒धाति॑ च॒त्वा॒रि छ॒न्दा॑ऽसि॒ छ॒न्दो॑भि॒रेव॑ तद्-यज॒मानः॑ सु॒वर्गं॑
लो॒क॒मे॒ति तेषा॑ऽसु॒वर्गं॑ लो॒कं य॒तां दि॒शः स॒म॒व्ली॒यन्त॑ ते द्वे
पु॒रस्ता॑थ् स॒मी॒ची उ॒पा॒द॒धत॑ द्वे – [] 17

5.2.3.4 - Padam

सू॒क्त॒मि॒ति॒ सु – उ॒क्तम् । भ॒व॒ति । ए॒तेन॑ । वै । वि॒श्वा॒मि॒त्र इति॑
वि॒श्व – मि॒त्रः । अ॒ग्नेः । प्रि॒यम् । धा॒म । अ॒वे॒ति । अ॒रु॒न्ध ।
अ॒ग्नेः । ए॒व । ए॒तेन॑ । प्रि॒यम् । धा॒म । अ॒वे॒ति । रु॒न्धे । छ॒न्दो॑भि॒रिति॑
छ॒न्दः – भिः । वै । दे॒वाः । सु॒वर्ग॒मि॒ति॒ सु॒वः – ग॒म् । लो॒कम् ।
आ॒यन् । च॒त॒स्रः । प्रा॒चीः । उ॒पे॒ति । द॒धाति॑ । च॒त्वा॒रि । छ॒न्दा॑ऽसि ।
छ॒न्दो॑भि॒रिति॑ छ॒न्दः – भिः । ए॒व । तत् । यज॒मानः॑ । सु॒वर्ग॒मि॒ति॒
सु॒वः – ग॒म् । लो॒कम् । ए॒ति । तेषा॑म् । सु॒वर्ग॒मि॒ति॒ सु॒वः – ग॒म् ।

लो॒कम् । य॒ताम् । दि॒शः । स॒मि॒ति॑ । अ॒व्ली॒यन्त॑ । ते । द्वे इति॑ ।
पुर॒स्तात् । स॒मी॒ची इति॑ । उ॒पेति॑ । अ॒द॒धत॑ । द्वे इति॑ । 17 (50)

5.2.3.5

प॒श्चात् स॒मी॒ची ता॒भिर्वै तेदि॒शोऽदृ॒हन् यद्द्वे पुर॒स्तात् स॒मी॒ची
उ॒प॒द॒धाति॑ द्वे प॒श्चात् स॒मी॒ची दि॒शां वि॒धृत्या॑ अथो प॒शवो॑ वै
छन्दा॑सि प॒शून्वा॒स्मै स॒मी॒चो द॒धात्य॑ष्टावुप द॒धात्य॑ष्टाक्षरा गाय॒त्री
गाय॒त्रोऽग्नि॑-र्यावा॒नेवा॒ग्निस्तं॑ चि॒नुते॑ष्टावुप द॒धात्य॑ष्टाक्षरा गाय॒त्री
गाय॒त्री सु॒वर्गं लो॒कम॑ञ्जसा वेद सु॒वर्गस्य॑ लो॒कस्य॑ – [] 18

5.2.3.5 - Padam

प॒श्चात् । स॒मी॒ची इति॑ । ता॒भिः । वै । ते । दि॒शः । अ॒दृ॒हन् ।
यत् । द्वे इति॑ । पुर॒स्तात् । स॒मी॒ची इति॑ । उ॒प॒द॒धातीत्युप॑ – द॒धाति॑ ।
द्वे इति॑ । प॒श्चात् । स॒मी॒ची इति॑ । दि॒शाम् । वि॒धृत्या॑ इति॑ वि॒धृत्यै॑ ।
अथो॑ इति॑ । प॒शवः॑ । वै । छन्दा॑सि । प॒शून् । ए॒व । अ॒स्मै ।
स॒मी॒चः । द॒धाति॑ । अ॒ष्टौ । उ॒पेति॑ । द॒धाति॑ । अ॒ष्टाक्ष॑रेत्य॒ष्टा-अ॒क्षरा॑ ।
गाय॒त्री । गाय॒त्रः । अ॒ग्निः । या॒वान् । ए॒व । अ॒ग्निः । तम् । चि॒नुते॑ ।

अष्टौ । उपेति । दधाति । अष्टाक्षरेत्यष्टा-अक्षरा । गायत्री । गायत्री ।
सुवर्गमिति सुवः – गम् । लोकम् । अञ्जसा । वेद ।
सुवर्गस्येति सुवः – गस्य । लोकस्य । 18 (50)

5.2.3.6

प्रज्ञात्यै त्रयोदश लोकंपृणा उप दधात्येकविंशतिः संपद्यन्ते
प्रतिष्ठा वा एकविंशः प्रतिष्ठा गार्हपत्य एकविंशस्यैव
प्रतिष्ठां गार्हपत्यमनु प्रति तिष्ठति प्रत्यग्निं चिक्र्यान्स्तिष्ठति य एवं
वेद पञ्चचितीकं चिन्वीत प्रथमं चिन्वानः पाङ्क्तो यज्ञः पाङ्क्तः
पशवो यज्ञमेव पशूनव रुन्धे त्रिचितीकं चिन्वीत द्वितीयं
चिन्वानस्त्रय इमे लोका एष्वेव लोकेषु – [] 19

5.2.3.6 - Padam

प्रज्ञात्या इति प्र – ज्ञात्यै । त्रयोदशेति त्रयः – दश ।
लोकंपृणा इति लोकं – पृणाः । उपेति । दधाति ।
एकविंशतिरित्येक – विंशतिः । समिति । पद्यन्ते । प्रतिष्ठेति
प्रति – स्था । वै । एकविंश इत्येक – विंशः ।

प्रति॑ष्ठेति॒ प्रति॑ – स्था॑ । गार्॒ह॒पत्य॑ इति॒ गार्॒ह॒ – पत्यः॑ ।
एक॑वि॒ंशस्ये॑त्येक॑ – वि॒ंशस्य॑ । ए॒व । प्रति॑ष्ठामिति॒ प्रति॑-स्था॒म् ।
गार्॒ह॒पत्य॑मिति॒ गार्॒ह॒ – पत्य॑म् । अनु॑ । प्रती॑ति । तिष्ठ॑ति । प्रती॑ति ।
अ॒ग्निम् । चि॒क्या॒नः । तिष्ठ॑ति । यः । ए॒वम् । वे॒द । पञ्च॑चितीकमिति॒
पञ्च॑-चितीकम् । चिन्वी॑त । प्रथ॑मम् । चिन्वा॑नः । पा॒ङ्कः । य॒ज्ञः ।
पा॒ङ्काः । प॒शवः॑ । य॒ज्ञम् । ए॒व । प॒शून् । अ॒वेति॑ । रु॒न्धे ।
त्रि॑चितीकमिति॒ त्रि॑ – चिती॑कम् । चिन्वी॑त । द्वितीय॑म् । चिन्वा॑नः ।
त्रयः॑ । इ॒मे । लो॒काः । ए॒षु । ए॒व । लो॒केषु॑ । 19 (50)

5.2.3.7

प्रति॑तिष्ठ्-त्येक॑चितीकं चिन्वी॑त तृतीयं॑ चिन्वा॑न एक॑धा वै सु॒वर्गो॑
लो॒क एक॑वृ॒तैव॑ सु॒वर्गं॑ लो॒कमे॑ति॒ पुरी॑षेणा॒भ्यूह॑ति॒ तस्मा॑न्मा॒ञ्
से॒नास्थि॑ छ॒न्नं न॑ दु॒श्चर्मा॑ भवति॒ य ए॒वं वे॒द पञ्च॑ चि॒तयो॑ भवन्ति॒
पञ्च॑भिः पुरी॑षैर॒भ्यूह॑ति॒ दश॑ संप॒द्यन्ते॑ द॒शाक्ष॑रा वि॒राड॑न्नं वि॒राड्
वि॒राज्ये॑वाऽन्नाद्ये॑ प्रति॑तिष्ठति । 20

5.2.3.7 - Padam

प्र॒तीति॑ । ति॒ष्ठति॑ । ए॒क॒चि॒तीक॑मि॒त्ये॒क - चि॒तीक॑म् । चि॒न्वी॒त ।
तृ॒तीय॑म् । चि॒न्वा॒नः । ए॒क॒धे॒त्ये॒क - धा । वै । सु॒वर्ग॑ इति॑
सु॒वः - गः । लो॒कः । ए॒क॒वृ॒ते॒त्ये॒क - वृ॒ता । ए॒व । सु॒वर्ग॑मि॒ति
सु॒वः - गम् । लो॒कम् । ए॒ति । पु॒री॒षेण॑ । अ॒भीति॑ । ऊ॒हति॑ ।
तस्मा॑त् । मा॒ञ्से॒न । अ॒स्थि॑ । छ॒न्नम् । न । दु॒श्च॒र्मेति॑ दुः - च॒र्मा ।
भ॒वति॑ । यः । ए॒वम् । वे॒द । पञ्च॑ । चि॒तयः॑ । भ॒वन्ति॑ ।
पञ्च॑भि॒रिति॑ पञ्च॑ - भिः । पु॒री॒षैः । अ॒भीति॑ । ऊ॒हति॑ । द॒श ।
स॒मिति॑ । प॒द्यन्ते॑ । द॒शाक्ष॑रेति॑ द॒श - अ॒क्षरा॑ । वि॒राडिति॑ वि-राट् ।
अ॒न्नम् । वि॒राडिति॑ वि - राट् । वि॒राजी॑ति वि - रा॒जि । ए॒व ।
अ॒न्नाद्य॑ इ॒त्यन्न॑ - अ॒द्ये । प्र॒तीति॑ । ति॒ष्ठति॑ । 20 (47)
(अ॒ध्य॒व॒सा॒य॒यति॑ - ह्ये॒त - द्वि॒श्वामि॑त्र॒स्या - द॒धत॑ द्वे - लो॒कस्य॑
- लो॒केषु॑ - स॒प्तच॑त्वारि॒ंशच्च॑) (A3)

5.2.4.1

वि॒ वा ए॒तौ द्वि॑षाते॒ यश्च॑ पु॒राऽग्नि॑र्यश्चो॒खाया॑ꣳ समि॑तमि॒ति च॒तसृ॑भिः
सं नि॒वप॑ति च॒त्वारि॑ छन्दाꣳसि॒ छन्दाꣳसि॑ खलु॒ वा अ॒ग्नेः प्रि॒या
त॒नूः प्रि॒ययै॒वैनौ॑ त॒नुवा॑ सꣳ शा॒स्ति॑ समि॑तमित्याह॒ तस्मा॑द्ब्रह्म॒णा
क्ष॒त्रꣳ समे॑ति॒ यत्सं॑ न्यु॒प्य वि॒हर॑ति॒ तस्मा॑द्ब्रह्म॒णा
क्ष॒त्रं व्यै॑त्यृतुभिः – [] 21

5.2.4.1 - Padam

वी॒ति । वै । ए॒तौ । द्वि॑षाते॒ इति॑ । यः । च । पु॒रा । अ॒ग्निः । यः ।
च । उ॒खाया॑ꣳ । समि॑ति । इ॒तम् । इति॑ । च॒तसृ॑भिरिति॒ चत॑सृ-भिः ।
सम् । नी॒ति । व॒पति॑ । च॒त्वारि॑ । छन्दाꣳसि॒ छन्दाꣳसि॑ । खलु॒ ।
वै । अ॒ग्नेः । प्रि॒या । त॒नूः । प्रि॒यया॑ । ए॒व । ए॒नौ । त॒नुवा॑ । समि॑ति ।
शा॒स्ति । समि॑ति । इ॒तम् । इति॑ । आ॒ह । तस्मा॑त् । ब्रह्म॒णा । क्ष॒त्रम् ।
समि॑ति । ए॒ति । यत् । सं॒न्यु॒प्येति॑ सं – न्यु॒प्य ।
वि॒हर॑तीति॒ वि – हर॑ति । तस्मा॑त् । ब्रह्म॒णा । क्ष॒त्रम् । वी॒ति । ए॒ति ।
ऋ॒तुभि॑रित्यृतु – भिः । 21 (50)

5.2.4.2

–वा॑ ए॒तं दी॑क्षयन्ति॒ स ऋ॒तुभि॑रे॒व वि॒मुच्यो॑ मा॒ते॒व पु॒त्रं पृ॒थि॒वी
पु॒री॒ष्यमि॒त्याह॑–तु॒भिरे॒वैनं॑ दी॒क्षयि॑त्व॒तुभि॑र्वि॒ मुञ्च॑ति॒ वैश्वा॒नर्या॑ शि॒क्यमा॑
द॒त्ते स्व॑दयत्ये॒वैन॑–नैर्ऋ॒तीः कृ॒ष्णा–स्ति॒स्र–स्तु॑ष॒पक्वा॑ भवन्ति॒
निर्ऋ॒त्यै वा॑ ए॒तद्–भा॒गधे॒यं य॑त् तुषा॒ निर्ऋ॒त्यै रू॒पं कृ॒ष्णां रू॒पेणै॒व
निर्ऋ॒तिं नि॒रव॑दयत॒ इमां॑ दि॒शं य॑न्त्ये॒षा – [] 22

5.2.4.2 - Padam

वै । ए॒तम् । दी॒क्षय॑न्ति । सः । ऋ॒तुभि॑रि॒त्यृ॒तु – भिः । ए॒व । वि॒मुच्य॑
इति॑ वि – मु॒च्यः । मा॒ता । इ॒व । पु॒त्रम् । पृ॒थि॒वी । पु॒री॒ष्यम् । इति॑ ।
आ॒ह । ऋ॒तुभि॑रि॒त्यृ॒तु – भिः । ए॒व । ए॒नम् । दी॒क्षयि॑त्वा ।
ऋ॒तुभि॑रि॒त्यृ॒तु–भिः । वी॒ति । मु॒ञ्च॑ति । वैश्वा॒नर्या॑ । शि॒क्यम् । एति॑ ।
द॒त्ते । स्व॑दयति । ए॒व । ए॒नत् । नैर्ऋ॒तीरि॑ति नैः–ऋ॒तीः । कृ॒ष्णाः ।
ति॒स्रः । तुष॑पक्वा इति॑ तुष – पक्वाः । भव॑न्ति ।
निर्ऋ॒त्या इति॑ निः – ऋ॒त्यै । वै । ए॒तत् । भा॒गधे॒यमि॑ति
भा॒ग – धे॒यम् । यत् । तुषाः॑ । निर्ऋ॒त्या इति॑ निः–ऋ॒त्यै । रू॒पम् ।

कृष्णम् । रूपेण । एव । निर्ऋतिमिति निः – ऋतिम् । निरवदयत
इति निः – अवदयते । इमाम् । दिशम् । यन्ति । एषा । 22 (50)

5.2.4.3

वै निर्ऋत्यै दिक् स्वायामेव दिशि निर्ऋतिं निरवदयते स्वकृत इरिण
उप दधाति प्रदरे वैतद्वै निर्ऋत्या आयतनं स्व एवाऽऽयतने
निर्ऋतिं निरवदयते शिष्यमभ्युप दधाति नैर्ऋतो वै पाशः
साक्षादेवैनं निर्ऋतिपाशान्-मुञ्चति तिस्र उप दधाति त्रेधाविहितो वै
पुरुषो यावानेव पुरुषस्तस्मान्-निर्ऋतिमव यजते पराचीरुप-[] 23

5.2.4.3 - Padam

वै । निर्ऋत्या इति निः – ऋत्यै । दिक् । स्वायाम् । एव । दिशि ।
निर्ऋतिमिति निः – ऋतिम् । निरवदयत इति निः – अवदयते ।
स्वकृत इति स्व – कृते । इरिणे । उपेति । दधाति । प्रदर इति
प्र – दरे । वा । एतत् । वै । निर्ऋत्या इति निः – ऋत्याः ।
आयतनमित्या – यतनम् । स्वे । एव । आयतन इत्या – यतने ।
निर्ऋतिमिति निः – ऋतिम् । निरवदयत इति निः – अवदयते ।

शि॒क्यम् । अ॒भि । उ॒पेति॑ । द॒धाति॑ । नैर्ऋ॒त इति॑ नैः – ऋ॒तः । वै ।
पा॒शः । सा॒क्षादि॑ति स – अ॒क्षात् । ए॒व । ए॒नम् । निर्ऋ॒तिपा॒शादि॑ति
निर्ऋ॒ति – पा॒शात् । मु॒ञ्चति॑ । ति॒स्रः । उ॒पेति॑ । द॒धाति॑ ।
त्रे॒धावि॑हित इति त्रे॒धा – वि॒हितः । वै । पु॒रुषः॑ । या॒वान् । ए॒व ।
पु॒रुषः॑ । तस्मा॑त् । निर्ऋ॒तिमि॑ति निः – ऋ॒तिम् । अ॒वेति॑ । य॒जते॑ ।
परा॑चीः । उ॒पेति॑ । 23 (50)

5.2.4.4

द॒धाति॑ परा॑चीमे॒वास्मान्-निर्ऋ॒तिं प्र॑णु॒दते॑ ऽप्र॒तीक्ष॑मा य॒न्ति
निर्ऋ॒त्या अ॒न्तर्हि॑त्यै मा॒र्जयि॑त्वो॒प ति॑ष्ठन्ते मे॒ध्यत्वा॑य गा॒र्हप॑त्यमु॒प
ति॑ष्ठन्ते निर्ऋ॒ति लो॒क ए॒व च॑रित्वा पू॒ता दे॒वलोक॑मु॒पाव॑र्तन्त
ए॒कयो॑प ति॑ष्ठन्त ए॒कधै॑व य॒जमा॑ने वी॒र्यं॑ द॒धति॑ नि॒वेश॑नः स॒ङ्गम॑नो
व॒सूना॑मित्या॒ह प्र॒जा वै प॒शवो॑ व॒सु प्र॒जयै॑वैनं प॒शुभिः॑
स॒म॒र्धय॑न्ति । 24

5.2.4.4 - Padam

द॒धा॒ति॒ । प॒रा॒ची॒म् । ए॒व । अ॒स्मा॒त् । नि॒र्ऋ॒ति॒मि॒ति॒ निः – ऋ॒ति॒म् ।
प्रे॒ति॒ । नु॒द॒ते॒ । अ॒प्र॒ती॒क्ष॒मि॒त्य॒प्र॒ति – ई॒क्ष॒म् । ए॒ति॒ । य॒न्ति॒ ।
नि॒र्ऋ॒त्या इ॒ति॒ निः – ऋ॒त्याः । अ॒न्त॒र्हि॒त्या इ॒त्य॒न्तः – हि॒त्यै ।
मा॒र्ज॒यि॒त्वा । उ॒पे॒ति॒ । ति॒ष्ठ॒न्ते॒ । मे॒ध्य॒त्वा॒ये॒ति॒ मे॒ध्य – त्वा॒य ।
गा॒र्ह॒प॒त्य॒मि॒ति॒ गा॒र्ह – प॒त्य॒म् । उ॒पे॒ति॒ । ति॒ष्ठ॒न्ते॒ । नि॒र्ऋ॒ति॒लो॒क इ॒ति॒
नि॒र्ऋ॒ति – लो॒के॒ । ए॒व । च॒रि॒त्वा । पू॒ताः । दे॒व॒लो॒क॒मि॒ति॒
दे॒व – लो॒क॒म् । उ॒पा॒व॒र्त॒न्त इ॒त्यु॒प – आ॒व॒र्त॒न्ते॒ । ए॒क॒या । उ॒पे॒ति॒ ।
ति॒ष्ठ॒न्ते॒ । ए॒क॒धे॒त्ये॒क – धा॒ । ए॒व । य॒ज॒मा॒ने॒ । वी॒र्य॑म् । द॒ध॒ति॒ ।
नि॒वे॒श॒न इ॒ति॒ नि॒-वे॒श॒नः । स॒ङ्ग॒म॒न इ॒ति॒ सं- ग॒म॒नः । व॒सू॒ना॒म् ।
इ॒ति॒ । आ॒ह॒ । प्र॒जे॒ति॒ प्र – जा॒ । वै । प॒श॒वः । व॒सु॒ ।
प्र॒ज॒ये॒ति॒ प्र – ज॒या॑ । ए॒व । ए॒न॒म् । प॒शु॒भि॒रि॒ति॒ प॒शु – भिः॒ ।
स॒मि॒ति॒ । अ॒र्ध॒य॒न्ति॒ । 24 (48)

(ऋ॒तु॒भि॒ – रे॒षा- प॒रा॒ची॒रु॒पा – षा॒च॒त्वा॒रि॒श॒च्च) (A4)

5.2.5.1

पुरुषमात्रेण वि मिमीते यज्ञेन वै पुरुषः संमितो यज्ञपरुषैवैनं
विमिमीते यावान् पुरुष ऊर्ध्वबाहुस्तावान् भवत्येतावद्वै पुरुषे वीर्यं
वीर्येणैवैनं वि मिमीते पक्षी भवति न ह्यपक्षः पतितु-मर्हत्यरन्निना
पक्षौ द्राघीयाऽसौ भवतस्तस्मात् पक्षप्रवयाऽसि वयाऽसि
व्याममात्रौ पक्षौ च पुच्छं च भवत्येतावद्वै पुरुषे वीर्यं -[] 25

5.2.5.1 - Padam

पुरुषमात्रेणेति पुरुष – मात्रेण । वीति । मिमीते । यज्ञेन । वै ।
पुरुषः । सम्मित इति सं – मितः । यज्ञपरुषेति यज्ञ-परुषा । एव ।
एनम् । वीति । मिमीते । यावान् । पुरुषः । ऊर्ध्वबाहुरित्युर्ध्व-बाहुः ।
तावान् । भवति । एतावत् । वै । पुरुषे । वीर्यम् । वीर्येण । एव ।
एनम् । वीति । मिमीते । पक्षी । भवति । न । हि । अपक्षः ।
पतितुम् । अर्हति । अरन्निना । पक्षौ । द्राघीयाऽसौ । भवतः ।
तस्मात् । पक्षप्रवयाऽसीति पक्ष – प्रवयाऽसि । वयाऽसि ।
व्याममात्राविति व्याम – मात्रौ । पक्षौ । च । पुच्छम् । च । भवति ।

ए॒ता॒व॒त् । वै । पु॒रु॒षे । वी॒र्य॑म् । 25 (50)

5.2.5.2

वी॒र्य॑सं॒मितो॑ वे॒णु॒ना वि मि॑मीत आ॒ग्ने॒यो वै वे॒णुः स॒यो॒नि॒त्वा॒य य॒जु॒षा
यु॒न॒क्ति य॒जु॒षा कृ॒षति॑ व्या॒वृ॒त्यै ष॒ड्ग॒वे॒न कृ॒षति॑ ष॒ड् वा ऋ॒त॒व
ऋ॒तु॒भि॒रे॒वैनं॑ कृ॒षति॑ यद् द्वा॒द॒श॒ग॒वे॒न सँ॒व॒थ्स॒रे॒णै॒वे यं वा
अ॒ग्ने-र॒ति॒दा॒हा॒द॒बि॒भे॒त् सै॒तद् द्वि॒गु॒ण॒म॒प॒श्य॒त् कृ॒ष्टं चा॒कृ॒ष्टं च॒ ततो॑
वा इ॒मां ना॒ऽत्य॑द॒ह॒द्य॒त् कृ॒ष्टं चा॒कृ॒ष्टं च॒ - [] 26

5.2.5.2 - Padam

वी॒र्य॑सं॒मित॒ इति॑ वी॒र्य॑ - सं॒मितः॑ । वे॒णु॒ना । वी॒ति॑ । मि॑मी॒ते ।
आ॒ग्ने॒यः । वै । वे॒णुः । स॒यो॒नि॒त्वा॒ये॒ति स॒यो॒नि॒ - त्वा॒य ।
य॒जु॒षा । यु॒न॒क्ति॑ । य॒जु॒षा । कृ॒षति॑ । व्या॒वृ॒त्या॒ इति॑ वि - आ॒वृ॒त्यै ।
ष॒ड्ग॒वे॒ने॒ति ष॒ट् - ग॒वे॒न । कृ॒षति॑ । ष॒ट् । वै । ऋ॒त॒वः ।
ऋ॒तु॒भि॒रि॒त्यु॒तु - भिः॑ । ए॒व । ए॒न॒म् । कृ॒षति॑ । य॒त् । द्वा॒द॒श॒ग॒वे॒ने॒ति
द्वा॒द॒श - ग॒वे॒न । सँ॒व॒थ्स॒रे॒णे॒ति सं - व॒थ्स॒रे॒ण । ए॒व । इ॒य॒म् । वै ।
अ॒ग्नेः॑ । अ॒ति॒दा॒हा॒दि॒त्य॒ति - दा॒हा॒त् । अ॒बि॒भे॒त् । सा । ए॒त॒त् ।

द्वि॒गुण॑मि॒ति द्वि॑ – गु॒णम् । अ॒प॒श्य॑त् । कृ॒ष्टम् । च॒ । अ॒कृ॒ष्टम् । च॒ ।
ततः॑ । वै । इ॒माम् । न । अ॒ती॒ति । अ॒द॒ह॒त् । यत् । कृ॒ष्टम् । च॒ ।
अ॒कृ॒ष्टम् । च॒ । 26 (50)

5.2.5.3

भ॒व॒त्य॒स्या॒ अ॒न॒ति॒दा॒हाय॑ द्वि॒गुणं॑ त्वा अ॒ग्नि॒-मु॒द्यन्तु॑-म॒र्ह॒ती॒त्याहु॑र्यत्
कृ॒ष्टं चा॒कृ॒ष्टं च॒ भ॒व॒त्य॒ग्ने॒रु॒द्य॒त्या ए॒ता॒व॒न्तो॒ वै प॒श॒वो॑ द्वि॒पाद॑श्च
च॒तु॒ष्पाद॑श्च तान् यत् प्रा॒च उ॒थ्सृ॑जेद्-रु॒द्रा॒या॒पि द॒ध्याद्-यद्-दक्षि॑णा
पि॒तृ॒भ्यो नि॒धु॒वे॒द्यत् प्र॒ती॒चो र॒क्षाँ॑सि ह॒न्यु॒रु॒दी॒च उ॒थ्सृ॑ज॒त्येषा॑ वै
दे॒व॒म॒नु॒ष्या॒णाँ शान्ता॑ दिक् – [] 27

5.2.5.3 - Padam

भ॒व॒ति । अ॒स्याः । अ॒न॒ति॒दा॒हाये॒त्यन॑ति – दा॒हाय॑ । द्वि॒गुण॑मि॒ति
द्वि॑ – गु॒णम् । तु । वै । अ॒ग्निम् । उ॒द्यन्तु॑मि॒त्युत् – यन्तु॑म् । अ॒र्ह॒ति ।
इ॒ति । आ॒हुः । यत् । कृ॒ष्टम् । च॒ । अ॒कृ॒ष्टम् । च॒ । भ॒व॒ति । अ॒ग्नेः ।
उ॒द्य॒त्या इ॒त्युत् – य॒त्यै । ए॒ता॒व॒न्तः । वै । प॒श॒वः । द्वि॒पाद॑ इ॒ति
द्वि॑ – पा॒दः । च॒ । च॒तु॒ष्पाद॑ इ॒ति च॒तुः – पा॒दः । च॒ । तान् । यत् ।

प्राचः । उ॒थ्सृ॒जे॒दित्यु॑त् – सृ॒जे॒त् । रु॒द्राय॑ । अ॒पीति॑ । द॒ध्यात् ।
यत् । दक्षि॑णा । पि॒तृभ्य॑ इति॑ पि॒तृ – भ्यः॑ । नीति॑ । धु॒वेत् । यत् ।
प्र॒तीचः॑ । रक्षा॑सि । ह॒न्युः । उ॒दीचः॑ । उ॒दिति॑ । सृ॒जति॑ । ए॒षा ।
वै । दे॒वमनु॑ष्याणामिति॑ दे॒व – मनु॑ष्याणाम् । शा॒न्ता । दिक् । 27 (50)

5.2.5.4

तामे॒वैनान॑नूथ् सृ॒जत्यथो॑ ख॒ल्विमां॑ दि॒शमु॑थ् सृ॒जत्यसौ॑ वा आ॒दित्यः॑
प्रा॒णः प्रा॒णमे॒वैनान॑नूथ्सृ॒जति॑ दक्षि॑णा पर्या॒वर्तन्ते॑ स्वमे॒व वीर्य॑मनु
पर्या॒वर्तन्ते॑ तस्मा॒द्-दक्षि॑णोऽर्ध आ॒त्मनो॑ वीर्या॒वत्तरोऽथो॑
आ॒दि॒त्यस्यै॒वाऽऽ*वृ॒तमनु॑ पर्या॒वर्तन्ते॑ तस्मा॒त् पराञ्चः॑ प॒शवो॑ वि
तिष्ठ॑न्ते प्र॒त्यञ्च॑ आ॒ वर्तन्ते॑ तिस्र॑स्ति॒स्रः सी॒ताः – [] 28

5.2.5.4 - Padam

ताम् । ए॒व । ए॒नान् । अ॒नु । उ॒दिति॑ । सृ॒जति॑ । अथो॑ इति॑ । ख॒लु ।
इ॒माम् । दि॒शम् । उ॒दिति॑ । सृ॒जति॑ । अ॒सौ । वै । आ॒दि॒त्यः । प्रा॒ण
इति॑ प्र – अ॒नः । प्रा॒णमिति॑ प्र – अ॒नम् । ए॒व । ए॒नान् । अ॒नु ।
उ॒दिति॑ । सृ॒जति॑ । दक्षि॑णा । पर्या॒वर्तन्ते॑ इति॑ परि – आ॒वर्तन्ते॑ ।

स्वम् । ए॒व । वी॒र्यम् । अ॒न्विति॑ । पर्या॑वर्तन्त इति॑ परि – आव॑र्तन्ते ।
तस्मा॑त् । दक्षि॑णः । अ॒र्धः । आ॒त्मनः॑ । वी॒र्या॑वत्तर इति॑
वी॒र्या॑वत् – तरः॑ । अथो॑ इति॑ । आ॒दित्य॑स्य । ए॒व । आव॑ृतमित्या॑ –
वृ॒तम् । अ॒न्विति॑ । पर्या॑वर्तन्त इति॑ परि – आव॑र्तन्ते । तस्मा॑त् ।
परा॑ञ्चः । प॒शवः॑ । वी॒ति । तिष्ठ॑न्ते । प्र॒त्यञ्चः॑ । ए॒ति । वर्त॑न्ते ।
ति॒स्रस्ति॑स्र इति॑ ति॒स्रः – ति॒स्रः । सी॒ताः । 28 (50)

5.2.5.5

कृ॒षति॑ त्रि॒वृ॒तमे॒व य॒ज्ञमु॒खे वि॑ या॒तय॑त्योष॒धीर्व॑पति॒ ब्र॒ह्म॒णाऽन्न॑मव॒ रुन्धे॑
ऽर्के॑ऽर्क॒श्ची॒यते॑ चतु॒र्दश॑भिर्वपति॒ सप्त॑ ग्रा॒म्या ओ॒षध॑यः स॒प्ताऽऽर॑ण्या
उ॒भयी॑षामव॒रुद्ध्य॑ आ॒न्नस्या॑न्नस्य॒ वप॑त्यन्नस्या॒न्नस्या॑व॒रुद्ध्यै॑ कृ॒ष्टे
व॑पति॒ कृ॒ष्टे ह्यो॒षध॑यः प्र॒तिति॑ष्ठन्त्यनु॒सीतं॑ व॒पति॑ प्र॒जात्यै॑ द्वा॒दश॑सु
सी॒तासु॑ व॑पति॒ द्वा॒दश॑ मा॒साः सँ॒वत्सरः॑ सँ॒वत्सरे॑णै॒वास्मा॑
अ॒न्नं प॑चति॒ यद॑ग्नि॒चि – [] 29

5.2.5.5 - Padam

कृ॒षति॑ । त्रि॒वृ॒तमि॑ति॒ त्रि॒ – वृ॒तम् । ए॒व । य॒ज्ञमु॒ख इति॑ य॒ज्ञ-मु॒खे ।
वी॒ति । या॒तय॑ति । ओ॒ष॒धीः । व॒पति॑ । ब्र॒ह्म॒णा । अ॒न्नम् । अ॒वेति॑ ।
रु॒न्धे । अ॒र्के । अ॒र्कः । ची॒यते॑ । च॒तु॒र्द॒शभि॑रिति॒ च॒तु॒र्द॒श – भिः॑ ।
व॒पति॑ । स॒प्त । ग्रा॒म्याः । ओ॒ष॒धयः॑ । स॒प्त । आ॒र॒ण्याः । उ॒भयी॑षाम् ।
अ॒वरु॑द्ध्य॒ इत्य॑व – रु॒ध्यै । अ॒न्नस्या॑न्न॒स्येत्य॑न्न॒स्य – अ॒न्नस्य॑ ।
व॒पति॑ । अ॒न्नस्या॑न्न॒स्येत्य॑न्न॒स्य-अ॒न्नस्य॑ । अ॒वरु॑द्ध्य॒ इत्य॑व-रु॒ध्यै ।
कृ॒ष्टे । व॒पति॑ । कृ॒ष्टे । हि । ओ॒ष॒धयः॑ । प्र॒ति॒ति॒ष्ठन्ती॑ति॒ प्र॒ति-ति॑ष्ठन्ति ।
अ॒नु॒सी॒तमि॑त्यनु॒ – सी॒तम् । व॒पति॑ । प्र॒जा॒त्या इति॑ प्र – जा॒त्यै ।
द्वा॒द॒शस्वि॑ति॒ द्वा॒द॒श – सु॒ । सी॒तासु॑ । व॒पति॑ । द्वा॒द॒श । मा॒साः ।
सँ॒व॒थ्स॒र इति॑ सं – व॒थ्स॒रः । सँ॒व॒थ्स॒रेणे॑ति॒ सं – व॒थ्स॒रेण॑ । ए॒व ।
अ॒स्मै । अ॒न्नम् । प॒चति॑ । यत् । अ॒ग्नि॒चि॒दि॒त्यग्नि॑ – चि॒त् । 29 (50)

5.2.5.6

-द॒नव॑रु॒द्धस्या॑-रु॒नीया॑द॒व-रु॒द्धेन॑ व्यृ॒ध्येत॑ ये व॒नस्प॑ती॒नां फ॒ल॒ग्र॒हय॑-
स्तानि॒ध्मेऽपि॑ प्रो॒क्षे-द॒नव॑रु॒द्धस्या॑-व॒रु॒द्ध्यै दि॒ग्भ्यो॑ लो॒ष्टान्थ्

सम॑स्यति दि॒शामे॑व वी॒र्य॑मवरु॒ध्य दि॒शां वी॒र्ये॑ऽग्निं चि॒नुते॑ यं
द्वि॒ष्ट्याद्-यत्र॑ स स्यात् तस्यै॑ दि॒शो लो॒ष्टमा॑ हरे॒दिष॑-मूर्ज॑मह॒मित आ॑
दद॑ इती॒षमे॑वोर्जं तस्यै॑ दि॒शोऽव॑ () रु॒न्धे क्षो॒धुको॑ भवति यस्तस्यां॑
दि॒शि भव॑त्युत्तरवेदिमुप॑ वपत्युत्तरवेद्या॑ ह्यग्निश्चीयते॑ ऽथो॑ प॒शवो॑ वा
उत्तरवे॒दिः प॒शूने॒वाव रु॒न्धेऽथो॑ यज्ञप॒रुषो॑ऽनन्तरित्यै॑ । 30

5.2.5.6 - Padam

अन॑वरुद्धस्येत्यन॑व-रुद्धस्य । अ॒शनी॑यात् । अ॒वरुद्धे॑नेत्यव॑ - रुद्धे॑न ।
वी॒ति । ऋ॒ध्ये॒त । ये॑ । वन॑स्पतीनाम् । फल॑ग्रहय॒ इति॑ फल॑-ग्रहयः ।
तान् । इ॒ध्मे । अ॒पि । प्रे॒ति । उ॒क्षेत् । अन॑वरुद्धस्येत्यन॑व-रुद्धस्य ।
अ॒वरु॒ध्या इत्य॑व - रु॒ध्यै । दि॒ग्भ्य इति॑ दिक् - भ्यः । लो॒ष्टान् ।
समि॑ति । अ॒स्यति॑ । दि॒शाम् । ए॒व । वी॒र्य॑म् । अ॒वरु॒ध्येत्य॑व-रुध्य॑ ।
दि॒शाम् । वी॒र्ये॑ । अ॒ग्निम् । चि॒नुते॑ । यम् । द्वि॒ष्ट्यात् । यत्र॑ । सः ।
स्यात् । तस्यै॑ । दि॒शः । लो॒ष्टम् । ए॒ति । हरे॑त् । इ॒षम् । ऊ॒र्जम् ।
अ॒हम् । इ॒तः । ए॒ति । द॒दे । इ॒ति । इ॒षम् । ए॒व । ऊ॒र्जम् । तस्यै॑ ।

दि॒शः । अ॒वे॒ति॑ () । रु॒न्धे॑ । क्षो॒धु॒कः॑ । भ॒व॒ति॑ । यः । त॒स्याम्॑ ।
दि॒शि॑ । भ॒व॒ति॑ । उ॒त्तर॑वे॒दि॒मित्यु॑त्तर – वे॒दिम् । उ॒पे॒ति॑ । व॒प॒ति॑ ।
उ॒त्तर॑वे॒द्या॒मित्यु॑त्तर – वे॒द्याम् । हि॒ । अ॒ग्निः॑ । ची॒य॒ते॑ । अ॒थो॒ इति॑ ।
प॒श॒वः॑ । वै । उ॒त्तर॑वे॒दि॒रित्यु॑त्तर – वे॒दिः । प॒शून् । ए॒व । अ॒वे॒ति॑ ।
रु॒न्धे॑ । अ॒थो॒ इति॑ । य॒ज्ञ॒प॒रुष॑ इति॑ य॒ज्ञ – प॒रुषः॑ ।
अ॒न॒न्तरि॑त्या इ॒त्यन॑न्तः – इ॒त्यै । 30 (75)

(च॒ भ॒व॒त्ये॒ता॒व॒द्वै॑ पु॒रु॒षे॑ वी॒र्यं॑ – य॒त्कृ॑ष्ट॒ञ्चाऽकृ॑ष्ट॒ञ्च – दि॒ग्-
सी॒ता – अ॒ग्नि॒चि॑ – द॒व – प॒ञ्च॒वि॒ंश॒तिश्च॑) (A5)

5.2.6.1

अ॒ग्ने॒ तव॑ श्र॒वो॒ वय॑ इति॑ सि॒क॒ता॒ नि॒ व॒प॒त्ये॒त॒द्वा॒ अ॒ग्ने॒र्वै॑श्वा॒नर॑स्य
सू॒क्तं॑ सू॒क्ते॒नै॒व वै॑श्वा॒नर॑म॒व रु॒न्धे॑ ष॒ड्भि॑र्नि॒ व॒प॒ति॑ ष॒ड्वा॒ ऋ॒त॒वः॑
सँ॒व॒त्स॒रः॑ सँ॒व॒त्स॒रो॑ऽग्नि॒र्वै॑श्वा॒नरः॑ सा॒क्षा॒दे॒व वै॑श्वा॒नर॑म॒व रु॒न्धे॑ स॒मु॒द्रं
वै॑ ना॒मै॒त॒च्छ॒न्दः॑ स॒मु॒द्र॒म॒नु॒ प्र॒जाः॑ प्र॒जा॒य॒न्ते॑ य॒दे॒ते॒न॒ सि॒क॒ता॒ नि॒
व॒प॒ति॑ प्र॒जा॒नां॑ प्र॒ज॒न॒ना॒ये॒न्द्रो॑ – [] 31

5.2.6.1 - Padam

अ॒ग्ने॑ । तव॑ । श्रवः॑ । वयः॑ । इति॑ । सि॒क॒ताः । नीति॑ । व॒प॒ति॒ ।
ए॒तत् । वै । अ॒ग्नेः॑ । वै॒श्वा॒न॒र॒स्य॑ । सू॒क्त॒मि॒ति॑ सु – उ॒क्त॒म् ।
सू॒क्ते॒ने॒ति॑ सु – उ॒क्ते॒न॑ । ए॒व । वै॒श्वा॒न॒र॒म् । अ॒वे॒ति॑ । रु॒न्धे॑ ।
ष॒ड्भि॒र॒ति॑ षट् – भिः॑ । नीति॑ । व॒प॒ति॒ । षट् । वै । ऋ॒त॒वः॑ ।
सँ॒व॒थ्स॒र॒ इति॑ सं – व॒थ्स॒रः॑ । सँ॒व॒थ्स॒र॒ इति॑ सं – व॒थ्स॒रः॑ ।
अ॒ग्निः॑ । वै॒श्वा॒न॒रः॑ । सा॒क्षा॒दि॒ति॑ स – अ॒क्षा॒त् । ए॒व । वै॒श्वा॒न॒र॒म् ।
अ॒वे॒ति॑ । रु॒न्धे॑ । स॒मु॒द्र॒म् । वै । ना॒म॑ । ए॒तत् । छ॒न्दः॑ । स॒मु॒द्र॒म् ।
अ॒न्वि॒ति॑ । प्र॒जा इति॑ प्र – जाः॑ । प्रेति॑ । जा॒य॒न्ते॑ । यत् । ए॒ते॒न॑ ।
सि॒क॒ताः । नि॒व॒प॒ती॒ति॑ नि – व॒प॒ति॑ । प्र॒जा॒ना॒मि॒ति॑ प्र – जा॒ना॒म् ।
प्र॒ज॒न॒ना॒ये॒ति॑ प्र – ज॒न॒ना॒य॑ । इ॒न्द्रः॑ । 31 (50)

5.2.6.2

वृ॒त्राय॑ व॒ज्रं॑ प्रा॒ह॒र॒थ् स त्रे॒धा व्य॑भव॒थ् स्फ्य॑स्तृ॒तीयं॑ र॒थस्तृ॒तीयं॑
यू॒पस्तृ॒तीयं॑ ये॒ऽन्तः॑ श॒रा अ॒शी॒र्य॒न्त॒ ताः श॑र्करा॒ अभ॑वन्
तच्छ॑र्कराणां॑ श॒र्कर॒त्वं व॑ज्रो॒ वै श॑र्कराः प॒शु॒र॒ग्नि॑-र्यच्छ॑र्करा॒भिर॒ग्निं॑

परिमिनोति॑ वज्रै॑णै॒वास्मै॑ प॒शून् परि॑ गृह्णाति॑ तस्माद्-वज्रै॑ण प॒शवः॑
परिगृही॑तास्तस्मा॒त् स्थे॒यान॑स्थे॒यसो॑ नोप॑ हरते॑ त्रिस॒प्ताभिः॑
प॒शुकाम॑स्य- [] 32

5.2.6.2 - Padam

वृ॒त्राय॑ । वज्र॑म् । प्रेति॑ । अ॒हरत् । सः । त्रे॒धा । वी॒ति । अ॒भवत् ।
स्फ्यः॑ । तृ॒तीयम् । रथः॑ । तृ॒तीयम् । यू॒पः । तृ॒तीयम् । ये ।
अ॒न्तः श॒रा इत्य॑न्तः-श॒राः । अ॒शीर्य॑न्त । ताः । श॒र्कराः॑ । अ॒भवन् ।
तत् । श॒र्करा॑णाम् । श॒र्कर॑त्वमिति॑ श॒र्कर॑ - त्वम् । वज्रः॑ । वै ।
श॒र्कराः॑ । प॒शुः । अ॒ग्निः । यत् । श॒र्करा॑भिः । अ॒ग्निम् ।
परिमिनो॑तीति॑ परि - मि॒नोति॑ । वज्रै॑ण । ए॒व । अ॒स्मै । प॒शून् ।
परी॑ति । गृह्णा॑ति । तस्मा॑त् । वज्रै॑ण । प॒शवः॑ । परिगृही॑ता इति॑
परि - गृही॑ताः । तस्मा॑त् । स्थे॒यान् । अ॒स्थेय॑सः । न । उपे॑ति ।
हर॑ते । त्रिस॒प्ताभि॑रिति॑ त्रि - स॒प्ताभिः॑ ।
प॒शुकाम॑स्येति॑ प॒शु - का॒मस्य॑ । 32 (50)

5.2.6.3

परि॑ मि॒नुया॑त् स॒प्त वै शी॒र्ष॒ण्याः॑ प्रा॒णाः प्रा॒णाः प॒शवः॑ प्रा॒णैरे॒वास्मै॑
प॒शून्व रु॒न्धे त्रि॒णवा॑भि-भ्रा॒तृव्य॑वत-स्त्रि॒वृ॒तमे॒व वज्र॑ सं॒भृत्य॑
भ्रा॒तृव्या॑य प्र॒हरति॑ स्तृ॒त्या अ॒परि॑मिताभिः परि॑ मि॒नुया-द॒परि॑मितस्या-
व॒रु॒द्ध्यै यं का॒मये॑ताप॒शुः स्या॑दित्य॒परि॑मित्य॒ तस्य॑ शर्क॒राः सि॒कता॑
व्यू॒हेद॒परि॑गृहीत ए॒वास्य॑ वि॒षूची॑न् रे॒तः परा॑ सिञ्चत्य॒पशु॑रेव
भवति॑ – [] 33

5.2.6.3 - Padam

परी॑ति । मि॒नुया॑त् । स॒प्त । वै । शी॒र्ष॒ण्याः॑ । प्रा॒णा इति॑ प्र-अ॒नाः ।
प्रा॒णा इति॑ प्र - अ॒नाः । प॒शवः॑ । प्रा॒णैरिति॑ प्र - अ॒नैः । ए॒व ।
अ॒स्मै । प॒शून् । अ॒वेति॑ । रु॒न्धे । त्रि॒णवा॑भिरिति॑ त्रि - न॒वाभिः॑ ।
भ्रा॒तृव्य॑वत इति॑ भ्रा॒तृव्य - वतः॑ । त्रि॒वृ॒तमिति॑ त्रि - वृ॒तम् । ए॒व ।
वज्र॑म् । सं॒भृत्ये॑ति सं - भृ॒त्य । भ्रा॒तृव्या॑य । प्रेति॑ । ह॒रति॑ । स्तृ॒त्यै ।
अ॒परि॑मिताभिरित्य॒परि - मि॒ताभिः॑ । परी॑ति । मि॒नुया॑त् ।
अ॒परि॑मितस्येत्य॒परि - मि॒तस्य॑ । अ॒व॒रु॒द्ध्यै इत्य॑व - रु॒द्ध्यै । यम् ।

कामये॑त । अप॒शुः । स्या॒त् । इति॑ । अप॒रिमि॒त्येत्य॑परि – मि॒त्य ।
तस्य॑ । शर्क॑राः । सिक्ताः॑ । वीति॑ । ऊहे॒त् ।
अपरि॑गृहीत इत्य॑परि – गृही॒ते । ए॒व । अ॒स्य । वि॒षूची॑नम् । रेतः॑ ।
परेति॑ । सिञ्च॑ति । अप॒शुः । ए॒व । भव॑ति । 33 (50)

5.2.6.4

यं कामये॑त प॒शुमान्त् स्या॒दिति॑ परि॒मित्य॑ तस्य॑ शर्क॑राः सिक्ताः॑
व्यूहे॒त् परि॑गृहीत ए॒वास्मै॑ समी॒चीन् रेतः॑ सिञ्च॑ति प॒शुमाने॒व भव॑ति
सौम्या॑ व्यूह॑ति सोमो॑ वै रेतो॑धा रेत॑ ए॒व तद्-द॑धाति गाय॒त्रिया
ब्रा॒ह्मण॑स्य गाय॒त्रो हि ब्रा॒ह्मण॑-स्त्रि॒ष्टुभा॑ राज॒न्यस्य॑ त्रै॒ष्टुभो॑ हि राज॒न्यः
श॒म्युं बा॒र्हस्प॑त्यं मे॒धो नो॑पान॒मत् सो॒ऽग्निं प्रा॑वि॒शत् - [] 34

5.2.6.4 - Padam

यम् । कामये॑त । प॒शुमानि॑ति प॒शु – मान् । स्या॒त् । इति॑ ।
परि॒मित्ये॑ति परि-मित्य॑ । तस्य॑ । शर्क॑राः । सिक्ताः॑ । वीति॑ । ऊहे॒त् ।
परि॑गृहीत इति॑ परि – गृही॒ते । ए॒व । अ॒स्मै । समी॒चीन॑म् । रेतः॑ ।
सिञ्च॑ति । प॒शुमानि॑ति प॒शु-मान् । ए॒व । भव॑ति । सौम्या॑ । वीति॑ ।

ऊ॒ह॒ति॒ । सोमः॑ । वै । रे॒तो॒धा इति॑ रे॒तः – धाः॑ । रे॒तः॑ । ए॒व । तत् ।
द॒धा॒ति॒ । गा॒य॒त्रि॒या । ब्रा॒ह्म॒ण॒स्य॑ । गा॒य॒त्रः॑ । हि । ब्रा॒ह्म॒णः॑ । त्रि॒ष्टु॒भा॑ ॥
रा॒ज॒न्य॒स्य॑ । त्रै॒ष्टु॒भः॑ । हि । रा॒ज॒न्यः॑ । शँ॒यु॒मि॒ति॑ शं – यु॒म् ।
बा॒र्ह॒स्प॒त्य॒म् । मे॒धः॑ । न । उ॒पे॒ति॑ । अ॒न॒म॒त् । सः॑ । अ॒ग्नि॒म् । प्रे॒ति॑ ।

अ॒वि॒श॒त् । 34 (50)

5.2.6.5

सो॒ऽग्नेः॑ कृ॒ष्णो॑ रू॒पं कृ॒त्वो॑दा॒य॒त सो॒ऽश्वं॑ प्रा॒ऽवि॒श॒त् सो॒ऽश्व॑स्या –
वा॒न्त॒र॒श॒फो॑-भ॒वद्-य॑द॒श्व॒मा॒क्र॒म॒य॒ति॒ य ए॒व मे॒धो॑ऽश्वं॑ प्रा॒ऽवि॒श॒त्
तमे॒वा॒व रु॒न्धे प्र॒जा॒प॒ति॒ना॒ऽग्नि॒श्चे॒त॒व्य॑ इ॒त्याहुः॑ प्रा॒जा॒प॒त्यो॑ऽश्वो
य॑द॒श्व॒मा॒क्र॒म॒य॒ति॒ प्र॒जा॒प॒ति॒नै॒वा॒ऽग्निं॑ चि॒नु॒ते पु॒ष्क॒र॒पर्ण॑मु॒प द॒धा॒ति॒ यो॒नि॒र्वा
अ॒ग्नेः॑ पु॒ष्क॒र॒पर्ण॑ꣳ स॒यो॒नि- () -मे॒वा॒ग्निं॑ चि॒नु॒ते ऽपां॑ पृ॒ष्ठ॒म॒सी॒त्यु॒प
द॒धा॒त्य॒पां॑ वा ए॒तत् पृ॒ष्ठं य॑त् पु॒ष्क॒र॒पर्ण॑ꣳ रू॒पे॒णै॒वैन॑दु॒प द॒धा॒ति॒ । 35

5.2.6.5 - Padam

सः॑ । अ॒ग्नेः॑ । कृ॒ष्णः॑ । रू॒प॒म् । कृ॒त्वा । उ॒दि॒ति॑ । आ॒य॒त॒ । सः॑ ।
अ॒श्व॒म् । प्रे॒ति॑ । अ॒वि॒श॒त् । सः॑ । अ॒श्व॒स्य॑ ।

अ॒वान्तर॑श॒फ इत्य॑वान्तर – श॒फः । अ॒भवत् । यत् । अ॒श्वम् ॥
आ॒क्र॒म॒य॒तीत्या॑ – क्र॒म॒य॒ति । यः । ए॒व । मे॒धः । अ॒श्वम् । प्रेति॑ ।
अ॒वि॒शत् । तम् । ए॒व । अ॒वेति॑ । रु॒न्धे । प्र॒जा॒प॒ति॒नेति॑
प्र॒जा – प॒ति॒ना । अ॒ग्निः । चे॒त॒व्यः । इति॑ । आ॒हुः । प्रा॒जा॒प॒त्य इति॑
प्रा॒जा – प॒त्यः । अ॒श्वः । यत् । अ॒श्वम् । आ॒क्र॒म॒य॒तीत्या॑ – क्र॒म॒य॒ति ।
प्र॒जा॒प॒ति॒नेति॑ प्र॒जा – प॒ति॒ना । ए॒व । अ॒ग्निम् । चि॒नु॒ते ।
पु॒ष्कर॑प॒र्णमि॑ति पु॒ष्कर – प॒र्णम् । उ॒पेति॑ । द॒धाति॑ । यो॒निः । वै ।
अ॒ग्नेः । पु॒ष्कर॑प॒र्णमि॑ति पु॒ष्कर – प॒र्णम् । स॒यो॒निमि॑ति
स॒यो॒निम् () । ए॒व । अ॒ग्निम् । चि॒नु॒ते । अ॒पाम् । पृ॒ष्ठम् । अ॒सि ।
इति॑ । उ॒पेति॑ । द॒धाति॑ । अ॒पाम् । वै । ए॒तत् । पृ॒ष्ठम् । यत् ।
पु॒ष्कर॑प॒र्णमि॑ति पु॒ष्कर – प॒र्णम् । रू॒पेण॑ । ए॒व । ए॒नत् । उ॒पेति॑ ।
द॒धाति॑ । 35 (70) (इन्द्रः – प॒शु॒का॒म॒स्य – भ॒वत्य॑ – वि॒शथ् –
स॒यो॒निं – वि॒श॒तिश्च॑) (A6)

5.2.7.1

ब्र॒ह्म ज॒ज्ञान॑मि॒ति रु॒क्ममु॑प॒ दधा॑ति ब्र॒ह्ममु॑खा॒ वै प्र॒जाप॑तिः प्र॒जा
अ॒सृज॑त ब्र॒ह्ममु॑खा॒ ए॒व तत् प्र॒जा य॑ज॒मानः॑ सृ॒जते॑ ब्र॒ह्म ज॒ज्ञान॑मित्या॒ह
तस्मा॑द्ब्रा॒ह्मणो॑ मु॒ख्यो मु॒ख्यो भ॑वति॒ य ए॒वं वै॑द ब्र॒ह्मवा॑दि॒नो व॑दन्ति॒ न
पृ॒थि॒व्यां ना॒न्तरि॑क्षे॒ न दि॒व्यग्नि॑श्चे॒तव्य॑ इति॒ यत् पृ॒थि॒व्यां चि॑न्वी॒त
पृ॒थि॒वीꣳ शु॒चाऽर्प॑ये॒न्नौष॑धयो॒ न व॑न॒स्पत॑यः- [] 36

5.2.7.1 - Padam

ब्र॒ह्म । ज॒ज्ञान॑म् । इति॑ । रु॒क्मम् । उ॒पेति॑ । द॒धाति॑ । ब्र॒ह्ममु॑खा इति॑
ब्र॒ह्म - मु॒खाः । वै । प्र॒जाप॑तिरिति॑ प्र॒जा - प॑तिः ।
प्र॒जा इति॑ प्र - जाः । अ॒सृज॑त । ब्र॒ह्ममु॑खा इति॑ ब्र॒ह्म - मु॒खाः ।
ए॒व । तत् । प्र॒जा इति॑ प्र - जाः । य॑ज॒मानः । सृ॒जते॑ । ब्र॒ह्म ।
ज॒ज्ञान॑म् । इति॑ । आ॒ह । तस्मा॑त् । ब्रा॒ह्मणः॑ । मु॒ख्यः । मु॒ख्यः ।
भ॑वति॒ । यः । ए॒वम् । वै॑द । ब्र॒ह्मवा॑दि॒न इति॑ ब्र॒ह्म - वा॑दि॒नः ।
व॑दन्ति॒ । न । पृ॒थि॒व्याम् । न । अ॒न्तरि॑क्षे । न । दि॒वि । अ॒ग्निः ।
चे॒तव्यः॑ । इति॑ । यत् । पृ॒थि॒व्याम् । चि॑न्वी॒त । पृ॒थि॒वीम् ।

शु॒चा । अ॒र्पये॑त् । न । ओ॒ष॒धयः॑ । न । व॒न॒स्प॒तयः॑ । 36 (50)

5.2.7.2

प्र जा॒येर॒न् यद॒न्तरि॑क्षे चि॒न्वी॒तान्तरि॑क्षं शु॒चाऽर्प॑येन्न वयाँ॒सि प्र
जा॒येर॒न् यद्-दि॒वि चि॒न्वी॒त दि॒वँ शु॒चाऽर्प॑येन्न प॒र्जन्यो॑
व॒र्षेदु॒क्ममु॑प दधा॒त्यमृ॑तं वै हि॒रण्य॑ममृ॒त ए॒वाग्निं॑ चि॒नुते॑ प्रजा॒त्यै
हि॒रण्य॑मयं पु॒रुष॑मु॒प दधा॑ति यज॒मान॑लो॒कस्य॑ वि॒धृत्यै॑ यद॒िष्ट॑काया
आ॒तृ॒ण्णम॑नू॒पद॑ध्यात् प॒शूनां॑ च यज॒मान॑स्य च प्रा॒णम॑पि

दध्याद् दक्षि॒णतः॑- [] 37

5.2.7.2 - Padam

प्रेति॑ । जा॒येर॒न् । यत् । अ॒न्तरि॑क्षे । चि॒न्वी॒त । अ॒न्तरि॑क्षम् । शु॒चा ।
अ॒र्पये॑त् । न । वयाँ॒सि । प्रेति॑ । जा॒येर॒न् । यत् । दि॒वि । चि॒न्वी॒त ।
दि॒वम् । शु॒चा । अ॒र्पये॑त् । न । प॒र्जन्यः॑ । व॒र्षेत् । रु॒क्मम् ।
उ॒पेति॑ । दधा॒ति । अ॒मृ॒तम् । वै । हि॒रण्य॑म् । अ॒मृ॒ते । ए॒व । अ॒ग्निम् ।
चि॒नुते॑ । प्रजा॒त्या इति॑ प्र - जा॒त्यै । हि॒रण्य॑म् । पु॒रुष॑म् । उ॒पेति॑ ।
दधा॒ति । यज॒मान॑लो॒कस्येति॑ यज॒मान - लो॒कस्य॑ ।

वि॒धृत्या॑ इति॒ वि-धृत्यै॑ । यत् । इ॒ष्टका॑याः । आ॒तृण्ण॑मि॒त्या-तृ॑ण्णम् ।
अ॒नूप॑द॒ध्यादि॑त्यनु - उ॒पद॑ध्यात् । प॒शूना॑म् । च । यज॑मानस्य । च ।
प्रा॒णमि॑ति प्र - अ॒नम् । अ॒पीति॑ । द॒ध्यात् । दक्षि॑णतः । 37 (50)

5.2.7.3

प्राञ्च॑मु॒प द॑धाति दा॒धार यज॑मानलो॒कं न प॑शूनां च यज॑मानस्य च
प्रा॒णम॑पि द॒धात्य॑थो ख॒ल्विष्ट॑काया आ॒तृण्ण॑म॒नूप द॑धाति प्रा॒णाना॑मु॒त्सृष्ट्यै॑
द्र॒प्सश्च॑स्क्र॒न्देत्य॑भि मृ॒शति॑ हो॒त्रास्वे॒वैनं॑ प्रति॒ष्ठाप॑यति सु॒चावु॑प
द॒धात्या॑ज्यस्य पूर्णां॑ का॒र्ष्यम॑यीं द॒ध्नः पूर्णा॑-मौदु॒ंबरी॑मियं वै
का॒र्ष्यम॑य्यसा॒वौ-दु॑ंबरी॒मे ए॒वोप॑ धत्ते - [] 38

5.2.7.3 - Padam

प्राञ्च॑म् । उ॒पेति॑ । द॒धाति॑ । दा॒धार । यज॑मानलो॒कमि॑ति
यज॑मान - लो॒कम् । न । प॒शूना॑म् । च । यज॑मानस्य । च ।
प्रा॒णमि॑ति प्र - अ॒नम् । अ॒पीति॑ । द॒धाति॑ । अथो॑ इति । ख॒लु ।
इ॒ष्टका॑याः । आ॒तृण्ण॑मि॒त्या - तृ॑ण्णम् । अनु॑ । उ॒पेति॑ । द॒धाति॑ ।
प्रा॒णाना॑मि॒ति प्र - अ॒नाना॑म् । उ॒त्सृष्ट्या॑ इत्युत् - सृष्ट्यै॑ । द्र॒प्सः ।

च॒स्क॒न्द॒ । इति॑ । अ॒भी॒ति॑ । मृ॒श॒ति॑ । हो॒त्रा॒सु॑ । ए॒व । ए॒न॒म् ।
प्र॒ती॒ति॑ । स्था॒प॒य॒ति॑ । सु॒चौ॑ । उ॒पे॒ति॑ । द॒धा॒ति॑ । आ॒ज्य॑स्य । पू॒र्णाम् ।
का॒र्ष्य॑मयी॒मि॒ति॑ का॒र्ष्य॑ – मयी॑म् । द॒ध्नः॑ । पू॒र्णाम् । औ॒दु॒म्बरी॑म् ।
इ॒य॒म् । वै । का॒र्ष्य॑मयी॒ति॑ का॒र्ष्य॑ – मयी॑ । अ॒सौ । औ॒दु॒म्बरी॑ ।
इ॒मे इति॑** । ए॒व । उ॒पे॒ति॑ । ध॒त्ते॑ । 38 (50)

5.2.7.4

तू॒ष्णी॑मु॒प॒ द॒धा॒ति॑ न ही॒मे य॒जु॒षाऽऽप्नु॑मर्॒हति॑ दक्षि॒णां का॒र्ष्य॑मयी॒ –
मु॒त्तरा॑मौ–दु॒म्बरीं॑ तस्मा॒दस्या॑ अ॒सावु॒त्तरा॑ ऽज्य॑स्य पू॒र्णाम् का॒र्ष्य॑मयीं॒
व॒ज्रो॒ वा आ॒ज्यं व॒ज्रः का॒र्ष्यो॑ व॒ज्रेणै॒व य॒ज्ञस्य॑ दक्षि॒णतो॑
र॒क्षाऽस्य॑प॒ ह॒न्ति॑ द॒ध्नः॑ पू॒र्णामौ॒दु॒म्बरीं॑ प॒शवो॑ वै द॒ध्यूर्गु॒दु॒म्बरः॑
प॒शुष्वे॒वोर्जं॑ द॒धा॒ति॑ पू॒र्णे उ॒प॒ द॒धा॒ति॑ पू॒र्णे ए॒वैन॑–[] 39

5.2.7.4 - Padam

तू॒ष्णी॑म् । उ॒पे॒ति॑ । द॒धा॒ति॑ । न । हि॒ । इ॒मे इति॑ । य॒जु॒षा । आ॒प्नु॑म् ।
अ॒र्ह॑ति॒ । दक्षि॑णाम् । का॒र्ष्य॑मयी॒मि॒ति॑ का॒र्ष्य॑ – मयी॑म् ।
उ॒त्तरा॑मित्युत् – त॒राम् । औ॒दु॒म्बरी॑म् । तस्मा॑त् । अ॒स्याः॑ । अ॒सौ ।

उ॒त्त॒रे॒त्यु॒त् – त॒रा । आ॒ज्य॒स्य॒ । पू॒र्णाम् । का॒र्ष॒म॒यी॒मि॒ति॒
का॒र्ष॒म॒यी॒ – म॒यि॒म् । व॒ज्रः॑ । वै । आ॒ज्य॒म् । व॒ज्रः॑ । का॒र्ष॒म॒यी॒ः ।
व॒ज्रे॒ण । ए॒व । य॒ज्ञ॒स्य॒ । द॒क्षि॒णतः॑ । र॒क्षा॒ꣳसि॑ । अ॒पे॒ति॒ ।
ह॒न्ति॒ । द॒ध्नः॑ । पू॒र्णाम् । औ॒दु॒म्ब॒री॒म् । प॒शवः॑ । वै । द॒धि॑ । ऊ॒र्क् ।
उ॒दु॒म्ब॒रः॑ । प॒शु॒षु॑ । ए॒व । उ॒र्ज॒म् । द॒धा॒ति॒ । पू॒र्णे॑ इति॒ । उ॒पे॒ति॒ ।
द॒धा॒ति॒ । पू॒र्णे॑ इति॒ । ए॒व । ए॒न॒म् । 39 (50)

5.2.7.5

म॒मु॒ष्मिन् लो॒क उ॒प॒ति॒ष्ठे॒ते वि॒रा॒ज्य॒ग्नि॒श्चे॒त॒व्य॒ इ॒त्याहुः॑ स्रु॒ग्वै
वि॒रा॒ज्य॒थ् स्रु॒चा॒वु॒प॒द॒धा॒ति॒ वि॒रा॒ज्ये॒वा॒ग्निं॑ चि॒नु॒ते य॒ज्ञ॒मु॒खे॒य॒ज्ञ॒मु॒खे॒ वै
क्रि॒य॒मा॒णे य॒ज्ञꣳ र॒क्षाꣳसि॑ जि॒घाꣳस॒न्ति॑ य॒ज्ञ॒मु॒खꣳ रु॒क्मो॑ यद्-
रु॒क्मं व्या॒घा॒र॒य॒ति॑ य॒ज्ञ॒मु॒खा॒दे॒व र॒क्षाꣳस्य॑प॒ ह॒न्ति॒ प॒ञ्च॒भिर्व्या॒घा॒र॒य॒ति॑
पा॒ङ्क्तो॑ य॒ज्ञो॒ या॒वा॒ने॒व य॒ज्ञ॒स्त॒स्माद्-र॒क्षाꣳस्य॑प॒ ह॒न्त्य॒क्ष्ण॒या॒व्या॑ घा॒र॒य॒ति॑
त॒स्मा॒द॒क्ष्ण॒या () प॒शवो॑ऽङ्गानि॒ प्र॒ ह॒र॒न्ति॒ प्र॒ति॒ष्ठि॒त्यै । 40

5.2.7.5 - Padam

अ॒मुष्मिन् । लो॒के । उ॒पेति॑ । ति॒ष्ठेते॑ इति॑ । वि॒राजीति॑ वि – राजि॑ ।
अ॒ग्निः । चे॒तव्यः॑ । इति॑ । आ॒हुः । सु॒क् । वै । वि॒राडिति॑ वि-राट् ।
यत् । सु॒चौ । उ॒प॒द॒धा॒तीत्यु॑प – द॒धाति॑ । वि॒राजीति॑ वि – राजि॑ ।
ए॒व । अ॒ग्निम् । चि॒नुते॑ । य॒ज्ञ॒मुखे॑ य॒ज्ञ॒मुख॑ इति॑ य॒ज्ञ॒मुखे॑-य॒ज्ञ॒मुखे॑ ।
वै । क्रि॒यमा॑णे । य॒ज्ञम् । रक्षा॑सि । जि॒घा॑सन्ति ।
य॒ज्ञ॒मुखमि॑ति य॒ज्ञ – मु॒खम् । रु॒क्मः । यत् । रु॒क्मम् । व्या॒घा॒रय॑तीति॑
वि – आ॒घा॒रय॑ति । य॒ज्ञ॒मुखा॑दिति॑ य॒ज्ञ – मु॒खात् । ए॒व । रक्षा॑सि ।
अ॒पेति॑ । ह॒न्ति । पञ्च॑भिरिति॑ पञ्च – भिः । व्या॒घा॒रय॑तीति॑
वि – आ॒घा॒रय॑ति । पा॒ङ्कः । य॒ज्ञः । या॒वान् । ए॒व । य॒ज्ञः । तस्मा॑त् ।
रक्षा॑सि । अ॒पेति॑ । ह॒न्ति । अ॒क्ष्ण॒या । व्या॒घा॒रय॑तीति॑
वि – आ॒घा॒रय॑ति । तस्मा॑त् । अ॒क्ष्ण॒या () । प॒शवः॑ । अ॒ङ्गानि॑ ।
प्रेति॑ । ह॒रन्ति॑ । प्र॒ति॒ष्ठित्या॑ इति॑ प्र॒ति – स्थि॑त्यै । 40 (55)

(वनस्पतयो- दक्षिणतो- धत्ते- एनं- तस्मा दक्षण्या- पञ्च च)

(A7)

5.2.8.1

स्वयमातृण्णामुप दधातीयं वै स्वयमातृण्णेमामेवोप धत्ते
ऽश्वमुप घ्रापयति प्राणमेवास्यां दधात्यथो प्राजापत्यो वा अश्वः
प्रजापतिनैवाऽग्निं चिनुते प्रथमेष्टकोपधीयमाना पशूनां च
यजमानस्य च प्राणमपि दधाति स्वयमातृण्णा भवति
प्राणानामुत्सृष्ट्या अथो सुवर्गस्य लोकस्यानुख्यात्या
अग्नावग्निश्चेतव्य इत्याहुरेष वा - [] 41

5.2.8.1 - Padam

स्वयमातृण्णामिति स्वयं - आतृण्णाम् । उपैति । दधाति । इयम् ।
वै । स्वयमातृण्णेति स्वयं-आतृण्णा । इमाम् । एव । उपैति । धत्ते ।
अश्वम् । उपैति । घ्रापयति । प्राणमिति प्र-अनम् । एव । अस्याम् ।
दधाति । अथो इति । प्राजापत्य इति प्रजा - पत्यः । वै । अश्वः ।
प्रजापतिनेति प्रजा - पतिना । एव । अग्निम् । चिनुते । प्रथमा ।

इ॒ष्ट॒का । उ॒प॒धी॒य॒मा॒ने॒त्यु॒प॒-धी॒य॒मा॒ना । प॒शू॒ना॒म् । च । य॒ज॒मा॒न॒स्य॑ ।
च । प्रा॒ण॒मि॒ति॒ प्र - अ॒न॒म् । अ॒पी॒ति॒ । द॒धा॒ति॒ । स्व॒य॒मा॒तृ॒णो॒ति॒
स्व॒यं - आ॒तृ॒णा॒ । भ॒व॒ति॒ । प्रा॒णा॒ना॒मि॒ति॒ प्र - अ॒ना॒ना॒म् ।
उ॒थ्सृ॒ष्ट्या॒ इ॒त्यु॒त् - सृ॒ष्ट्यै॒ । अ॒थो॒ इ॒ति॒ । सु॒व॒र्ग॒स्ये॒ति॒ सु॒वः-ग॒स्य॑ ।
लो॒क॒स्य॑ । अ॒नु॒ख्या॒त्या॒ इ॒त्य॒नु - ख्या॒त्यै॒ । अ॒ग्नौ॒ । अ॒ग्निः॑ ।
चे॒त॒व्यः॑ । इ॒ति॒ । आ॒हुः॑ । ए॒षः॑ । वै । 41 (50)

5.2.8.2

अ॒ग्नि॒र्वै॒श्वा॒न॒रो॒ यद्ब्रा॒ह्म॒ण॒स्तस्मै॑ प्र॒थ॒मा॒मि॒ष्ट॒कां॑ य॒जु॒ष्कृ॒तां॑ प्र॒य॒च्छे॒त्
तां॑ ब्रा॒ह्म॒ण॒श्चो॒प द॒ध्या॒ता-म॒ग्ना॒वे॒व तद॒ग्निं॑ चि॒नु॒त ई॒श्व॒रो॒ वा ए॒ष
आ॒र्ति॒मा॒र्तो॒र्यो-वि॒द्वानि॒ष्ट॒का-मु॒प॒द॒धा॒ति॒ त्री॒न् व॒रा॒न् द॒द्या॒त्
त्र॒यो॒ वै प्रा॒णाः॑ प्रा॒णा॒नां॑ स्पृ॒त्यै॒ द्वा॒वे॒व दे॒यौ॒ द्वौ॒ हि प्रा॒णा॒वे॒क ए॒व
दे॒य ए॒को॒ हि प्रा॒णः॑ प॒शु - [] 42

5.2.8.2 - Padam

अ॒ग्निः॑ । वै॒श्वा॒न॒रः॑ । य॒त् । ब्रा॒ह्म॒णः॑ । तस्मै॑ । प्र॒थ॒मा॒म् । इ॒ष्ट॒का॒म् ।
य॒जु॒ष्कृ॒ता॒मि॒ति॒ य॒जुः॑ - कृ॒ता॒म् । प्रे॒ति॒ । य॒च्छे॒त् । ता॒म् । ब्रा॒ह्म॒णः॑ ।

च । उपेति । दध्याताम् । अ॒ग्नौ । ए॒व । तत् । अ॒ग्निम् । चि॒नुते ।
ई॒श्वरः । वै । ए॒षः । आ॒र्तिम् । आ॒र्तो॒रित्या॒-अ॒र्तोः । यः । अ॒वि॒द्वान् ।
इ॒ष्ट॒काम् । उप॒दधा॒तीत्यु॒प – दधा॑ति । त्रीन् । व॒रान् । द॒द्यात् । त्रयः ।
वै । प्रा॒णा इति॑ प्र – अ॒नाः । प्रा॒णाना॑मिति॑ प्र – अ॒नाना॑म् । स्पृ॒त्यै ।
द्वौ । ए॒व । दे॒यौ । द्वौ । हि । प्रा॒णावि॑ति प्र – अ॒नौ । ए॒कः । ए॒व ।
दे॒यः । ए॒कः । हि । प्रा॒ण इति॑ प्र – अ॒नः । प॒शुः । 42 (50)

5.2.8.3

–वा ए॒ष यद॒ग्निर्न॑ ख॒लु वै प॒शव॑ आ॒यव॑से रमन्ते दूर्वेष्ट॒कामु॑प
दधा॑ति प॒शूनां॑ धृ॒त्यै द्वा॒भ्यां प्र॑तिष्ठि॒त्यै का॒ण्डा॑त् का॒ण्डा॑त्
प्र॒रोह॑न्तीत्याह का॒ण्डे॑नका॒ण्डे॑न ह्ये॒षा प्र॑ति॒तिष्ठ॑त्ये॒वा नो॑ दूर्वे प्र॒तनु॑
सह॒स्रेण॑ श॒तेन॑ चे॒त्याह॑ सा॒हस्रः॑ प्र॒जाप॑तिः प्र॒जाप॑तेरा॒प्त्यै दे॒वल॑क्ष्मं
वै त्र्या॒लि॒खिता॑ ता॒मुत्तर॑लक्ष्माणं दे॒वा उपा॑दधता-ध॒रल॑क्ष्माण-
म॒सुरा॑ यं – [] 43

5.2.8.3 - Padam

वै । ए॒षः । यत् । अ॒ग्निः । न । ख॒लु । वै । प॒शवः॑ । आ॒यव॑से ।
र॒मन्ते॑ । दूर्वे॑ष्ट॒कामि॑ति दूर्वा॑ – इ॒ष्ट॒काम् । उ॒पेति॑ । द॒धाति॑ ।
प॒शूनाम् । धृ॒त्यै॑ । द्वा॒भ्याम् । प्र॒तिष्ठि॑त्या इति॑ प्र॒ति – स्थि॒त्यै ।
का॒ण्डा॒त्का॒ण्डा॒दिति॑ का॒ण्डा॒त् – का॒ण्डा॒त् । प्र॒रोह॑न्तीति॑ प्र॒रोह॑न्ती ।
इति॑ । आ॒ह । का॒ण्डे॑न॒काण्डे॑नेति॑ का॒ण्डे॑न – का॒ण्डे॑न । हि । ए॒षा ।
प्र॒ति॒तिष्ठ॑तीति॑ प्र॒ति – तिष्ठ॑ति । ए॒वा । नः । दूर्वे॑ । प्रेति॑ । त॒नु ।
स॒हस्रे॑ण । श॒तेन॑ । च । इति॑ । आ॒ह । सा॒हस्रः॑ । प्र॒जाप॑तिरिति॑
प्र॒जा – प॒तिः । प्र॒जाप॑तेरिति॑ प्र॒जा – प॒तेः । आ॒प्स्यै॑ ।
दे॒वल॑क्ष्ममिति॑ दे॒व-ल॑क्ष्मम् । वै । त्र्या॒लि॒खिते॑ति॑ त्रि – आ॒लि॒खिता॑ ।
ताम् । उ॒त्तर॑लक्ष्माणमित्यु॒त्तर – ल॑क्ष्माणम् । दे॒वाः । उ॒पेति॑ ।
अ॒दध॑त । अ॒धर॑लक्ष्माणमित्य॒धर – ल॑क्ष्माणम् । अ॒सुराः॑ ।

यम् । 43 (50)

5.2.8.4

कामये॑त वसी॑यान्त् स्यादित्यु॑त्तरलक्ष्माणं॑ तस्यो॑प दध्याद्-वसी॑याने॒व
भवति॑ यं कामये॑त पापी॑यान्त् स्यादित्यध॑रलक्ष्माणं॑ तस्यो॑प
दध्यादसुरयो॑नि-मे॒वैन॑मनु॒ परा॑ भावयति॑ पापी॑यान् भवति॑ त्र्यालि॒खिता॑
भवती॑मे॒ वै लो॒कास्त्र्यालि॒खितै॑भ्य ए॒व लो॒केभ्यो॑ भ्रातृ॑व्यमन्तरे॒त्यङ्गिर॑सः
सुव॑र्गं लो॒कं य॒तः पु॒रोडा॑शः कू॒र्मो भू॒त्वाऽनु॑ प्रास॑र्प- [] 44

5.2.8.4 - Padam

कामये॑त । वसी॑यान् । स्यात् । इति॑ ।
उत्तर॑लक्ष्माणमित्यु॑त्तर-लक्ष्माणम् । तस्य॑ । उपे॑ति । दध्यात् ।
वसी॑यान् । ए॒व । भव॑ति । यम् । कामये॑त । पापी॑यान् । स्यात् ।
इति॑ । अध॑रलक्ष्माणमित्यध॑र- लक्ष्माणम् । तस्य॑ । उपे॑ति । दध्यात् ।
असुर॑यो॒निमित्य॑सुर - यो॒निम् । ए॒व । ए॒नम् । अनु॑ । पे॑ति ।
भाव॑यति । पापी॑यान् । भव॑ति । त्र्यालि॒खिते॑ति त्रि - आलि॒खिता॑ ।
भव॑ति । इ॒मे । वै । लो॒काः । त्र्यालि॒खिते॑ति त्रि - आलि॒खिता॑ ।

ए॒भ्यः । ए॒व । लो॒के॒भ्यः । भ्रा॒तृ॒व्यम् । अ॒न्तः । ए॒ति । अ॒ङ्गि॒रसः ।
सु॒व॒र्गमि॒ति सु॒वः – गम् । लो॒कम् । य॒तः । पु॒रो॒डा॒शः । कू॒र्मः ।
भू॒त्वा । अ॒नु । प्रे॒ति । अ॒स॒र्पत् । 44 (50)

5.2.8.5

– द्यत् कू॒र्ममु॒प॒दधा॑ति यथा॑ क्षे॒त्रवि॒दञ्ज॑सा न॒यत्ये॒वमे॒वैनं॑ कू॒र्मः
सु॒व॒र्गं लो॒कमञ्ज॑सा न॒यति॑ मे॒धो वा ए॒ष प॒शूनां॑ यत् कू॒र्मो यत्
कू॒र्ममु॒प दधा॑ति स्वमे॒व मे॒धं प॒श्यन्तः॑ प॒शव॑ उप॒ तिष्ठ॑न्ते श॒मशानं॑ वा
ए॒तत् क्रि॑यते यन्मृ॒तानां॑ प॒शूनां॑ शी॒र्षाण्यु॑प॒धी॒यन्ते॑ यज्जी॒वन्तं॑
कू॒र्ममु॒प दधा॑ति तेना॒शम॑शानचि॒द्वास्त॒व्यो वा ए॒ष यत् – [] 45

5.2.8.5 - Padam

यत् । कू॒र्मम् । उ॒प॒दधा॑तीत्यु॒प – दधा॑ति । यथा॑ । क्षे॒त्रवि॒दि॒ति
क्षे॒त्र – वि॒त् । अ॒ञ्ज॑सा । न॒यति॑ । ए॒वम् । ए॒व । ए॒नम् । कू॒र्मः ।
सु॒व॒र्गमि॒ति सु॒वः – गम् । लो॒कम् । अ॒ञ्ज॑सा । न॒यति॑ । मे॒धः । वै ।
ए॒षः । प॒शूना॑म् । यत् । कू॒र्मः । यत् । कू॒र्मम् । उ॒प॒दधा॑तीत्यु॒प –
दधा॑ति । स्वम् । ए॒व । मे॒धम् । प॒श्यन्तः॑ । प॒शवः॑ । उ॒पे॒ति ।

तिष्ठन्ते॑ । श्म॒शान॑म् । वै । ए॒तत् । क्रि॒यते॑ । यत् । मृ॒ताना॑म् ।
प॒शूना॑म् । शी॒र्षाणि॑ । उप॒धी॒यन्त॑ इत्युप – धी॒यन्ते॑ । यत् ।
जी॒वन्त॑म् । कू॒र्मम् । उप॒दधा॑तीत्युप – दधा॑ति । ते॒न ।
अ॒श्म॒शान॑चि॒दित्य॑श्म॒शान – चि॒त् । वा॒स्तव्यः॑ । वै । ए॒षः ।
यत् । 45 (50)

5.2.8.6

कू॒र्मो मधु॑ वा॒ता ऋ॒ताय॑त इति॑ द॒ध्ना म॑धुमि॒श्रेणा॑भ्य॒नक्ति॑ स्व॒दय॑त्ये॒वैनं॑
ग्रा॒म्यं वा॑ ए॒तदन्नं॑ यद्-द॒ध्या॒रण्यं॑ मधु॑ यद्द॒ध्ना म॑धुमि॒श्रेणा॑
भ्य॒नक्त्यु॑भय॒स्या ऽव॑रु॒द्ध्यै म॒ही द्यौः पृ॑थि॒वी च न॑ इत्या॒हा
ऽऽभ्या॑मे॒वैनमु॑भय॒तः परि॑गृ॒ह्णाति॑ प्रा॒ञ्चमु॑प दधा॑ति सु॒वर्ग॑स्य लो॒कस्य॑
सम॑ष्ट्यै पु॒रस्ता॑त् प्र॒त्यञ्च॑मुप दधा॑ति तस्मा॑त् – [] 46

5.2.8.6 - Padam

कू॒र्मः । मधु॑ । वा॒ताः । ऋ॒ताय॑त इत्यृ॒त – य॑ते । इति॑ । द॒ध्ना ।
म॑धुमि॒श्रेणे॑ति मधु॑ – मि॒श्रेण॑ । अ॒भीति॑ । अ॒नक्ति॑ । स्व॒दय॑ति । ए॒व ।

ए॒नम् । ग्रा॒म्यम् । वै । ए॒तत् । अ॒न्नम् । यत् । दधि॑ । आ॒र॒ण्यम् ।
म॒धु । यत् । द॒ध्ना । म॒धुमि॑श्रेणेति म॒धु – मि॒श्रेण॑ । अ॒भ्यन॑क्तीत्य॒भि
– अन॑क्ति । उ॒भय॑स्य । अ॒वरु॑द्ध्या इत्य॒व – रु॒द्ध्यै । म॒ही । द्यौः ।
पृ॒थि॒वी । च । नः । इति॑ । आ॒ह । आ॒भ्याम् । ए॒व । ए॒नम् ।
उ॒भय॑तः । प॒रीति॑ । गृ॒ह्णाति॑ । प्रा॒ञ्चम् । उ॒पेति॑ । द॒धाति॑ ।
सु॒वर्ग॑स्येति सु॒वः – ग॒स्य । लो॒कस्य॑ । स॒म॒ष्ट्या इति॑ सं-अ॒ष्ट्यै ।
पु॒रस्ता॑त् । प्र॒त्यञ्च॑म् । उ॒पेति॑ । द॒धाति॑ । तस्मा॑त् । 46 (50)

5.2.8.7

पु॒रस्ता॑त् प्र॒त्यञ्चः॑ प॒शवो॑ मे॒धमु॑प तिष्ठन्ते यो वा अ॒प॒ना॒भि॒म॒ग्निं
चि॒नुते॑ यज॒मान॑स्य ना॒भि॒म॒नु प्र॑विशति स ए॒नमी॑श्व॒रो
हि॒॒सि॒तोरु॑लू॒खल॑मु॒प द॑धात्येषा वा अ॒ग्नेर्ना॒भिः स॒ना॒भि॒मे॒वा॒ग्निं
चि॒नुते॑ हि॒॒सा॒या औ॑दु॒म्बरं॑ भ॒वत्यू॑र्वा उ॒दु॒म्बर॑ ऊ॒र्जमे॒वाव॑ रु॒न्धे
म॒ध्यत॑ उप॒ दधा॑ति म॒ध्यत॑ ए॒वास्मा॑ ऊ॒र्जं द॑धाति तस्मा॑न्-()-म॒ध्यत॑
ऊ॒र्जा भु॑ञ्जत इ॒यद्-भ॑वति प्र॒जाप॑तिना य॒ज्ञमु॑खेन सं॒मित॑म॒व

ह॒न्त्य॒न्न॒मे॒वाक॑-वै॒ष्ण॒व्य॒र्चो॑प॒ दधा॑ति वि॒ष्णुर्वै॒ य॒ज्ञो वै॒ष्णा॒वा व॒न॒स्पत॑यो
य॒ज्ञ ए॒व य॒ज्ञं प्र॑तिष्ठापयति । 47

5.2.8.7 - Padam

पु॒रस्ता॑त् । प्र॒त्यञ्चः॑ । प॒शवः॑ । मे॒धम् । उ॒पेति॑ । ति॒ष्ठन्ते॑ । यः । वै ।
अ॒प॒ना॒भि॒मि॒त्यप॑ – ना॒भिम् । अ॒ग्निम् । चि॒नुते॑ । य॒ज॒मा॒नस्य॑ ।
ना॒भिम् । अ॒नु । प्रे॑ति । वि॒शति॑ । सः । ए॒नम् । ई॒श्वरः॑ । हि॒॒सि॒तोः ।
उ॒लू॒ख॒लम् । उ॒पेति॑ । द॒धाति॑ । ए॒षा । वै । अ॒ग्नेः । ना॒भिः ।
स॒ना॒भि॒मि॒ति स॑ – ना॒भिम् । ए॒व । अ॒ग्निम् । चि॒नुते॑ । अ॒हि॒॒सा॒यै ।
औ॒दु॒म्बर॑म् । भ॒वति॑ । ऊ॒र्क् । वै । उ॒दु॒म्बरः॑ । ऊ॒र्जम् । ए॒व । अ॒वेति॑ ।
रु॒न्धे । म॒ध्यतः॑ । उ॒पेति॑ । द॒धाति॑ । म॒ध्यतः॑ । ए॒व । अ॒स्मै । ऊ॒र्जम् ।
द॒धाति॑ । तस्मा॑त् () । म॒ध्यतः॑ । ऊ॒र्जा । भु॒ञ्जते॑ । इ॒यत् । भ॒वति॑ ।
प्र॒जा॒प॒ति॒नेति॑ प्र॒जा – प॒ति॒ना । य॒ज्ञमु॒खेनेति॑ य॒ज्ञ – मु॒खेन॑ ।
स॒मि॒त॒मि॒ति सं॑ – मि॒तम् । अ॒वेति॑ । ह॒न्ति । अ॒न्नम् । ए॒व । अ॒कः ।
वै॒ष्ण॒व्या । ऋ॒चा । उ॒पेति॑ । द॒धाति॑ । वि॒ष्णुः । वै । य॒ज्ञः । वै॒ष्णा॒वाः ।

वनस्पतयः । यज्ञे । एव । यज्ञम् । प्रतीति । स्थापयति । 47 (77)

(एष वै – पशु – र्य – मसर्प – देश यत् – तस्मात् – तस्मात् – सप्तविंशतिश्च) (A8)

5.2.9.1

एषां वा एतल्लोकानां ज्योतिः सम्भृतं यदुखा यदुखा-मुपदधात्येभ्य
एव लोकेभ्यो ज्योतिरव रुन्धे मध्यत उप दधाति मध्यत एवास्मै
ज्योतिर्दधाति तस्मान्मध्यतो ज्योतिरुपाऽऽस्महे सिकताभिः

पूरयत्येतद्वा अग्नेर्वैश्वानरस्य रूपं रूपेणैव वैश्वानरमव रुन्धे यं
कामयेत क्षोधुकः स्यादित्यूनां तस्योप- [] 48

5.2.9.1 - Padam

एषाम् । वै । एतत् । लोकानाम् । ज्योतिः । संभृतमिति सं-भृतम् ।
यत् । उखा । यत् । उखाम् । उपदधातीत्युप-दधाति । एभ्यः । एव ।
लोकेभ्यः । ज्योतिः । अवेति । रुन्धे । मध्यतः । उपेति । दधाति ।
मध्यतः । एव । अस्मै । ज्योतिः । दधाति । तस्मात् । मध्यतः ।
ज्योतिः । उपेति । आस्महे । सिकताभिः । पूरयति । एतत् । वै ।

अ॒ग्नेः । वै॒श्वान॒रस्य॑ । रू॒पम् । रू॒पेण॑ । ए॒व । वै॒श्वान॒रम् । अ॒वेति॑ ।
रु॒न्धे । यम् । का॒मये॑त । क्षो॒धुकः॑ । स्या॒त् । इति॑ । ऊ॒नाम् । तस्य॑ ।
उ॒पेति॑ । 48 (50)

5.2.9.2

द॒ध्यात् क्षो॒धुक॑ ए॒व भ॑वति यं का॒मये॑ता-नु॒पद॑स्य-द॒न्नम॑द्यादिति पूर्णां
तस्यो॒प द॒ध्यादनु॑पदस्य-दे॒वान्न॑मत्ति स॒हस्रं॑ वै प्र॒ति पु॑रुषः प॒शूनां॑
य॑च्छति स॒हस्र॑म॒न्ये प॒शवो॑ म॒ध्ये पु॑रुष॒शीर्ष॑मु॒प द॑धाति
स॒वीर्य॑त्वायो-खा॒याम॑पि द॒धाति प्र॑तिष्ठा॒मेवै॑नद्-ग॒मय॑ति व्यृ॒द्धं वा
ए॒तत् प्रा॒णैर॑मे॒ध्यं य॑त् पु॒रुष॑शीर्ष॒ममृ॑तं ख॒लु वै प्रा॒णा - [] 49

5.2.9.2 - Padam

द॒ध्यात् । क्षो॒धुकः॑ । ए॒व । भ॑वति । यम् । का॒मये॑त ।
अनु॒पद॑स्य॒दित्यनु॑प - द॒स्यत् । अ॒न्नम् । अ॒द्यात् । इति॑ । पूर्णा॑म् ।
तस्य॑ । उ॒पेति॑ । द॒ध्यात् । अनु॒पद॑स्य॒दित्यनु॑प - द॒स्यत् । ए॒व ।
अ॒न्नम् । अ॒त्ति । स॒हस्र॑म् । वै । प्र॒तीति॑ । पु॒रुषः॑ । प॒शूनाम् ।
य॑च्छति । स॒हस्र॑म् । अ॒न्ये । प॒शवः॑ । म॒ध्ये ।

पुरु॒षशी॒र्षमि॑ति॒ पुरु॒ष – शी॒र्षम् । उ॒पेति॑ । द॒धाति॑ । स॒वीर्य॑त्वायेति॒
स॒वीर्य॑-त्वाय॑ । उ॒खाया॑म् । अ॒पीति॑ । द॒धाति॑ । प्र॒तिष्ठा॑मिति॒ प्रति॑ –
स्था॑म् । ए॒व । ए॒नत् । ग॒मय॑ति । व्यृ॒द्धमि॑ति॒ वि – ऋ॒द्धम् । वै ।
ए॒तत् । प्रा॒णैरि॑ति॒ प्र – अ॒नैः । अ॒मेध्य॑म् । यत् । पुरु॒षशी॒र्षमि॑ति॒
पुरु॒ष – शी॒र्षम् । अ॒मृत॑म् । ख॒लु । वै । प्रा॒णा इति॑ प्र – अ॒नाः ।

49 (50)

5.2.9.3

अ॒मृत॑ हिर॒ण्यं प्रा॒णेषु॑ हिर॒ण्यश॑ल्कान् प्रत्य॑स्यति॒ प्रति॑ष्ठामे॒वैन॑द्-
ग॒मयि॑त्वा प्रा॒णैः स॒मर्ध॑यति॒ द॒ध्ना म॑धुमिश्रे॒ण पू॑रयति॒ मध॑व्योऽ॒सानी॑ति॒
शृ॒तात॑ङ्क्येन॒ मेध्य॑त्वाय॒ ग्राम्यं॑ वा ए॒तद॑न्नं यद्-द॒ध्यार॑ण्यं मधु॒ यद्द॑ध्ना
म॑धुमिश्रे॒ण पू॑रयत्यु॒भय॑स्या-व॒रुद्ध्यै॑ प॒शुशी॒र्षाण्यु॑प॒ दधा॑ति॒ प॒शवो॑
वै प॒शुशी॒र्षाणि॑ प॒शून्वा॑व रु॒न्धे यं का॑मये॒ताप॑शुः स्या॒दिति॑-[] 50

5.2.9.3 - Padam

अ॒मृत॑म् । हिर॒ण्यम् । प्रा॒णेष्वि॑ति॒ प्र – अ॒नेषु॑ । हिर॒ण्यश॑ल्कानिति॒
हिर॒ण्य – श॑ल्कान् । प्र॒तीति॑ । अ॒स्यति॑ । प्र॒तिष्ठा॑मिति॒ प्रति॑-स्था॑म् ।

ए॒व । ए॒नत् । ग॒म॒यि॒त्वा । प्रा॒णै॒रि॒ति प्र-अ॒नैः । स॒मि॒ति । अ॒र्ध॒य॒ति ।
द॒ध्ना । म॒धु॒मि॒श्रे॒णे॒ति म॒धु-मि॒श्रे॒ण । पू॒र॒य॒ति । म॒ध॒व्यः । अ॒सा॒नि ।
इ॒ति । शृ॒ता॒त॒ङ्क्ये॒ने॒ति शृ॒त - आ॒त॒ङ्क्ये॒न । मे॒ध्य॒त्वा॒ये॒ति
मे॒ध्य - त्वा॒य । ग्रा॒म्य॒म् । वै । ए॒तत् । अ॒न्न॒म् । यत् । द॒धि ।
आ॒र॒ण्य॒म् । म॒धु । यत् । द॒ध्ना । म॒धु॒मि॒श्रे॒णे॒ति म॒धु - मि॒श्रे॒ण ।
पू॒र॒य॒ति । उ॒भ॒य॒स्य । अ॒व॒रु॒द्ध्य॒ इत्य॒व - रु॒द्ध्यै ।
प॒शु॒शी॒र्षा॒णी॒ति प॒शु - शी॒र्षा॒णि । उ॒पे॒ति । द॒धा॒ति । प॒श॒वः । वै ।
प॒शु॒शी॒र्षा॒णी॒ति प॒शु - शी॒र्षा॒णि । प॒शून् । ए॒व । अ॒वे॒ति । रु॒न्धे ।
य॒म् । का॒म॒ये॒त । अ॒प॒शुः । स्या॒त् । इ॒ति । 50 (50)

5.2.9.4

वि॒षू॒ची॒ना॒नि त॒स्यो॒प द॒द्ध्य॒ाद्-वि॒षू॒च ए॒वास्मा॑त् प॒शून् द॒धा॒त्य॒प॒शु॒रे॒व
भ॒व॒ति यं का॒म॒ये॒त प॒शु॒मा॒न्थ्-स्या॒दि॒ति स॒मी॒ची॒ना॒नि त॒स्यो॒प द॒द्ध्य॒ात्
स॒मी॒च ए॒वास्मै॑ प॒शून् द॒धा॒ति प॒शु॒मा॒ने॒व भ॒व॒ति पु॒रस्ता॑त्
प्र॒ती॒ची॒न॒मश्च॑स्यो॒प द॒धा॒ति प॒श्चा॒त् प्रा॒ची॒न॒मृष॑भ॒स्या-प॒श॒वो वा अ॒न्ये

गो॑ अ॒श्वेभ्यः॑ प॒शवो॑ गो॒ अ॒श्वाने॑वा॒स्मै॑ स॒मीचो॑ द॒धात्ये॑-ता॒वन्तो॑ वै
प॒शवो॑ – [] 51

5.2.9.4 - Padam

वि॒षूची॑नानि । तस्य॑ । उ॒पेति॑ । द॒ध्यात् । वि॒षूचः॑ । ए॒व । अ॒स्मात् ।
प॒शून् । द॒धाति॑ । अ॒पशुः॑ । ए॒व । भ॒वति॑ । यम् । का॒मये॑त ।
प॒शुमा॑निति प॒शु – मा॒न् । स्या॒त् । इति॑ । स॒मीची॑नानि । तस्य॑ ।
उ॒पेति॑ । द॒ध्यात् । स॒मीचः॑ । ए॒व । अ॒स्मै । प॒शून् । द॒धाति॑ ।
प॒शुमा॑निति प॒शु – मा॒न् । ए॒व । भ॒वति॑ । पु॒रस्ता॑त् । प्र॒तीची॑नम् ।
अ॒श्वस्य॑ । उ॒पेति॑ । द॒धाति॑ । प॒श्चात् । प्रा॒चीनम्॑ । ऋ॒षभ॑स्य ।
अ॒पश॑वः । वै । अ॒न्ये । गो॒ अ॒श्वेभ्य इति॑ गो॒ – अ॒श्वेभ्यः॑ । प॒शवः॑ ।
गो॒ अ॒श्वानिति॑ गो॒ – अ॒श्वान् । ए॒व । अ॒स्मै । स॒मीचः॑ । द॒धाति॑ ।
ए॒ताव॑न्तः । वै । प॒शवः॑ । 51 (50)

5.2.9.4

द्वि॒पादश्च॑ च॒तुष्पा॑दश्च॒ तान् वा॑ ए॒तद॑ग्नौ प्र॒दधा॑ति यत् प॒शुशी॑र्षा॒ण्युप॑ –
द॒धात्ये॑-मु॒मा॒रण्य॑मनु ते दि॒शामी॑त्याह॒ ग्राम्ये॑भ्य ए॒व प॒शुभ्य॑ आ॒रण्यान्॑

प॒शूञ्छु॑च॒मनू॑त्सृ॒जति॑ तस्मा॑त् स॒माव॑त् प॒शूनां॑ प्र॒जाय॑मानाना-मा॒रण्याः॑
प॒शवः॑ कनी॒याऽसः॑ शु॒चा ह्य॑ताः सर्प॑शी॒र्षमु॑प दधाति॑ यैव स॒र्पे
त्वि॒षिस्ता॑मे॒वाव रु॑न्धे- [] 52

5.2.9.5 - Padam

द्वि॒पाद॑ इति॑ द्वि - पा॒दः । च । चतु॑ष्पाद॑ इति॑ चतुः - पा॒दः । च ।
तान् । वै । ए॒तत् । अ॒ग्नौ । प्रे॑ति । द॒धाति॑ । यत् ।
प॒शुशी॑र्षाणीति॑ प॒शु - शी॑र्षाणि । उ॒पद॑धातीत्यु॒प - द॑धाति ।
अ॒मुम् । आ॒र॒ण्यम् । अ॒न्विति॑ । ते । दि॒शामि॑ । इति॑ । आ॒ह ।
ग्रा॒म्येभ्यः॑ । ए॒व । प॒शुभ्य॑ इति॑ प॒शु - भ्यः॑ । आ॒र॒ण्यान् । प॒शून् ।
शु॒चम् । अ॒नू । उ॒दिति॑ । सृ॒जति॑ । तस्मा॑त् । स॒माव॑त् । प॒शूनाम् ।
प्र॒जाय॑मानानामिति॑ प्र - जा॒यमा॑नानाम् । आ॒र॒ण्याः । प॒शवः॑ ।
कनी॒याऽसः॑ । शु॒चा । हि । ऋ॒ताः । सर्प॑शी॒र्षमिति॑
सर्प॑ - शी॒र्षम् । उ॒पेति॑ । द॒धाति॑ । या । ए॒व । स॒र्पे । त्वि॒षिः ।
ताम् । ए॒व । अ॒वेति॑ । रु॑न्धे । 52 (50)

5.2.9.5

य॒त् स॒मी॒ची॒नं॑ प॒शु॒शी॒र्षै॒रु॒प द॒ध्या॒द् ग्रा॒म्यान् प॒शून् द॒शु॒काः
स्यु॒र्यद्-वि॒षू॒ची॒न-मा॒र॒ण्यान् य॒जु॒रे॒व व॒दे॒द॒व तां॑ त्वि॒षि॒रु॒न्धे॒ या स॒र्पे
न ग्रा॒म्यान् प॒शून् हि॒न॒स्ति॒ नाऽऽ*र॒ण्या॒न॒थो ख॒लू॒प॒धे॒य॒मे॒व यदु॒प॒द॒धा॒ति
ते॒न तां॑ त्वि॒षि॒म॒व रु॒न्धे॒ या स॒र्पे यद्-य॒जु॒र्व॒द॒ति ते॒न शा॒न्तं । 53

5.2.9.6 - Padam

यत् । स॒मी॒ची॒नम् । प॒शु॒शी॒र्षै॒रिति॑ प॒शु - शी॒र्षैः ।
उ॒प॒द॒ध्या॒दि॒त्यु॒प - द॒ध्या॒त् । ग्रा॒म्यान् । प॒शून् । द॒शु॒काः ।
स्युः । यत् । वि॒षू॒ची॒नम् । आ॒र॒ण्यान् । य॒जुः । ए॒व । व॒दे॒त् ।
अ॒वे॒ति॑ । ता॒म् । त्वि॒षि॒म् । रु॒न्धे॒ । या । स॒र्पे । न । ग्रा॒म्यान् । प॒शून् ।
हि॒न॒स्ति॑ । न । आ॒र॒ण्यान् । अ॒थो इति॑ । ख॒लु ।
उ॒प॒धे॒य॒मि॒त्यु॒प - धे॒य॒म् । ए॒व । यत् । उ॒प॒द॒धा॒ती॒त्यु॒प - द॒धा॒ति॑ ।
ते॒न । ता॒म् । त्वि॒षि॒म् । अ॒वे॒ति॑ । रु॒न्धे॒ । या । स॒र्पे । यत् । य॒जुः ।
व॒द॒ति॑ । ते॒न । शा॒न्तम् । 53 (44)

(ऊ॒नान्त॑स्यो॒प॑ – प्रा॒णाः – स्या॒दिति॑ – वै प॒शवो॑ – रु॒न्धे –
चतु॑श्चत्वारि॒ंशच्च॑) (A9)

5.2.10.1

प॒शुर्वा ए॒ष यद॑ग्निर्यो॒निः ख॒लु वा ए॒षा प॒शोर्वि॑ क्रि॒यते॑ यत्
प्रा॒चीन॑मै॒ष्टका॑द्-य॒जुः क्रि॒यते॑ रेतो॑ऽप॒स्या अप॒स्या उप॑ दधा॒ति
यो॒नावे॑व रेतो॑ दधा॒ति प॒ञ्चोप॑ दधा॒ति पा॒ङ्गाः प॒शवः॑ प॒शून्वा॒स्मै
प्र॒जन॑यति॒ पञ्च॑ दक्षि॒णतो॑ वज्रो॒ वा अप॒स्या वज्रे॑णै॒व य॒ज्ञस्य॑
दक्षि॒णतो॑ रक्षा॒ञ्स्यप॑ हन्ति॒ पञ्च॑ प॒श्चात् – [] 54

5.2.10.1 - Padam

प॒शुः । वै । ए॒षः । यत् । अ॒ग्निः । यो॒निः । ख॒लु । वै । ए॒षा ।
प॒शोः । वी॒ति । क्रि॒यते॑ । यत् । प्रा॒चीन॑म् । ऐ॒ष्टका॑त् । य॒जुः ।
क्रि॒यते॑ । रेतः॑ । अप॒स्याः । अप॒स्याः । उपे॑ति । दधा॒ति । यो॒नौ ।
ए॒व । रेतः॑ । दधा॒ति । प॒ञ्च । उपे॑ति । दधा॒ति । पा॒ङ्गाः । प॒शवः॑ ।
प॒शून् । ए॒व । अ॒स्मै । प्रे॑ति । जन॑यति । प॒ञ्च । दक्षि॒णतः॑ । वज्रः॑ ।
वै । अप॒स्याः । वज्रे॑ण । ए॒व । य॒ज्ञस्य॑ । दक्षि॒णतः॑ । रक्षा॒ञ्सि ।

अ॒पे॒ति॒ । ह॒न्ति॒ । प॒ञ्च॒ । प॒श्चात् । 54 (50)

5.2.10.2

प्रा॒ची॒रुप॑ द॒धाति॑ प॒श्चाद्वै॑ प्रा॒चीन॑ꣳ रे॒तो॑ धी॒यते॑ प॒श्चादे॒वास्मै॑ प्रा॒चीन॑ꣳ
रे॒तो॑ द॒धाति॑ प॒ञ्च पु॒रस्तात्॑ प्र॒तीची॑रुप॑ द॒धाति॑ प॒ञ्च प॒श्चात्
प्रा॒चीस्त॑स्मात् प्रा॒चीन॑ꣳ रे॒तो॑ धी॒यते॑ प्र॒तीचीः॑ प्र॒जा जा॒यन्ते॑
प॒ञ्चोत्तर॑तः छ॒न्दस्याः॑ प॒शवो॑ वै छ॒न्दस्याः॑ प॒शूने॒व प्र॒जाता॑न्थ्
स्वमा॒यत॑नम॒भि पर्यू॑हत इ॒यं वा॑ अ॒ग्ने-र॑तिदाहाद॒बिभे॑त् सैता- [] 55

5.2.10.2 - Padam

प्रा॒चीः । उ॒पे॒ति॒ । द॒धाति॑ । प॒श्चात् । वै । प्रा॒चीन॑म् । रे॒तः । धी॒यते॑ ।
प॒श्चात् । ए॒व । अ॒स्मै । प्रा॒चीन॑म् । रे॒तः । द॒धाति॑ । प॒ञ्च ।
पु॒रस्तात्॑ । प्र॒तीचीः॑ । उ॒पे॒ति॒ । द॒धाति॑ । प॒ञ्च । प॒श्चात् । प्रा॒चीः ।
त॑स्मात् । प्रा॒चीन॑म् । रे॒तः । धी॒यते॑ । प्र॒तीचीः॑ । प्र॒जा इति॑ प्र-जाः ।
जा॒यन्ते॑ । प॒ञ्च । उ॒त्तर॑त इत्युत् - तरतः । छ॒न्दस्याः॑ । प॒शवः॑ ।
वै । छ॒न्दस्याः॑ । प॒शून् । ए॒व । प्र॒जाता॑निति प्र - जा॒तान् । स्वम् ।
आ॒यत॑नमित्या - यत॑नम् । अ॒भि । प॒रीति॑ । ऊ॒हते॑ । इ॒यम् । वै ।

अ॒ग्नेः । अ॒ति॒दा॒हा॒दि॒त्य॒ति॑ – दा॒हात् । अ॒भि॒भे॒त् । सा ।

ए॒ताः । 55 (50)

5.2.10.3

अ॒प॒स्या॑ अ॒प॒श्य॒त् ता॑ उ॒पा॒ध॒त्त॑ त॒तो वा॑ इ॒मां ना॒त्य॒द॒ह॒द्-य॒द॒प॒स्या॑
उ॒प॒धा॒त्य॒स्या॑ अ॒न॒ति॒दा॒हा॒यो॒वाच॑ हे॒य॒म॒द॒दि॒त् स॒ ब्र॒ह्म॒णा॒ऽन्नं॑ य॒स्यै॒ता
उ॒प॒धी॒यान्तै॑ य॒ उ॒ चै॒ना ए॒वँ॒वे द॒दि॒ति प्रा॒णभृ॑त॒ उप॑ द॒धा॒ति रे॒त॒स्ये॒व
प्रा॒णान् द॒धा॒ति तस्मा॑द्-व॒दन् प्रा॒णन् प॒श्य॒ञ्छृ॒ण्वन् प॒शु॒र्जा॒यते॑ ऽयं

पु॒रो – [] 56

5.2.10.3 - Padam

अ॒प॒स्याः॑ । अ॒प॒श्य॒त् । ताः । उ॒पे॒ति॑ । अ॒ध॒त्त॑ । त॒तः । वै । इ॒माम् ।
न । अ॒ती॒ति॑ । अ॒द॒ह॒त् । य॒त् । अ॒प॒स्याः॑ । उ॒प॒धा॒ती॒त्यु॒प – द॒धा॒ति ।
अ॒स्याः॑ । अ॒न॒ति॒दा॒हा॒ये॒त्य॒न॒ति॑ – दा॒हा॒य । उ॒वाच॑ । ह॒ । इ॒यम् ।
अ॒द॒त् । इ॒त् । सः । ब्र॒ह्म॒णा । अ॒न्नम् । य॒स्य॑ । ए॒ताः ।
उ॒प॒धी॒यान्ता॑ इ॒त्यु॒प – धी॒यान्तै॑ । यः । उ॒ । च॒ । ए॒नाः । ए॒वम् ।
वे॒द॒त् । इ॒ति॑ । प्रा॒णभृ॑त॒ इति॑ प्रा॒ण-भृ॑तः । उ॒पे॒ति॑ । द॒धा॒ति॑ । रे॒त॒सि॑ ।

ए॒व । प्रा॒णानि॑ति॒ प्र – अ॒नान् । द॒धाति॑ । तस्मा॑त् । वद॑न् ।

प्रा॒णानि॑ति॒ प्र – अ॒नन् । प॒श्यन् । शृ॒ण्वन् । प॒शुः । जा॒यते॑ ।

अ॒यम् । पु॒रः । 56 (50)

5.2.10.4

भु॒व इति॑ पु॒रस्ता॑दुप॒ दधा॑ति प्रा॒णमे॒वैता॑भिर्-दा॒धारा॑ऽयं दक्षि॒णा
वि॒श्वक॑र्मेति॒ दक्षि॑णतो॒ मन॑ ए॒वैता॑भिर्दा॒धारा॑यं प॒श्चाद्-वि॒श्वव्य॑चा इति॑
प॒श्चा-च्च॑क्षु॒रेवै॑ताभिर्-दा॒धारे॑द-मु॒त्तरा॑थ् सु॒वरि॑त्युत्तरतः
श्रो॒त्रमे॒वैता॑भिर्-दा॒धारे॑यमु॒परि॑ मतिरि॒त्युप॑रि॒ष्टाद्-वा॒चमे॒वैता॑भिर्-दा॒धार
द॒शद॑शोप॒ दधा॑ति स॒वीर्य॑त्वाया॒क्ष्णयो॑- [] 57

5.2.10.4 - Padam

भु॒वः । इति॑ । पु॒रस्ता॑त् । उ॒पेति॑ । द॒धाति॑ । प्रा॒णमि॑ति॒ प्र – अ॒नम् ।
ए॒व । ए॒ताभिः॑ । दा॒धार । अ॒यम् । दक्षि॑णा ।
वि॒श्वक॑र्मेति॒ वि॒श्व-क॑र्मा । इति॑ । दक्षि॑णतः । मनः॑ । ए॒व । ए॒ताभिः॑ ।
दा॒धार । अ॒यम् । प॒श्चात् । वि॒श्वव्य॑चा इति॑ वि॒श्व – व्य॒चाः ।

इति॑ । पश्चात्॑ । चक्षुः॑ । ए॒व । ए॒ताभिः॑ । दा॒धार । इ॒दम् ।
उ॒त्तरा॑दित्युत् – त॒रात् । सु॒वः । इति॑ । उ॒त्तर॑त इत्युत् – त॒रतः॑ ।
श्रो॒त्रम् ॥ ए॒व । ए॒ताभिः॑ । दा॒धार । इ॒यम् । उ॒परि॑ । म॒तिः । इति॑ ।
उ॒परि॑ष्ठात् । वा॒चम् ॥ ए॒व । ए॒ताभिः॑ । दा॒धार । द॒शद॑शेति द॒श–द॒श ।
उ॒पेति॑ । द॒धाति॑ । स॒वीर्य॑त्वायेति स॒वीर्य॑–त्वाय॑ । अ॒क्ष्ण॒या । 57 (50)

5.2.10.5

–प॑ द॒धाति॑ तस्मा॑दक्ष्ण॒या प॒शवो॑ऽङ्गानि॑ प्र॒हर॑न्ति प्र॒तिष्ठि॑त्यै याः
प्रा॒ची॒स्ताभि॑–र्वसि॑ष्ठ आ॒ध्नो॑द्या दक्षि॒णा ताभि॑र्भर॒द्वाजो॑ याः
प्र॒ती॒ची॒स्ताभि॑–र्वि॒श्वामि॑त्रो या उ॒दी॒ची॒स्ताभि॑–र्ज॒मद॑ग्निर्या ऊ॒र्ध्वास्ताभि॑–
र्वि॒श्वक॑र्मा य ए॒वमे॒तासामृ॑द्धिं वै॒दध्नो॑त्ये॒व य आ॒सामे॒वं ब॑न्धुतां वै॒द
ब॑न्धु॒मान् भ॑वति॒ य आ॒सामे॒वं क्लृ॑प्तिं वै॒द क॑ल्पते– [] 58

5.2.10.5 - Padam

उ॒पेति॑ । द॒धाति॑ । तस्मा॑त् ॥ अ॒क्ष्ण॒या । प॒शवः॑ । अ॒ङ्गानि॑ । प्रेति॑ ।
ह॒रन्ति॑ । प्र॒तिष्ठि॑त्या इति॑ प्र॒ति – स्थि॑त्यै । याः । प्रा॒चीः । ताभिः॑ ।
वसि॑ष्ठः । आ॒ध्नो॑त् । याः । दक्षि॒णा । ताभिः॑ । भ॒रद्वा॑जः । याः ।

प्र॒ती॒चीः॑ । ता॒भिः॑ । वि॒श्वा॒मि॒त्र इति॑ वि॒श्व – मि॒त्रः॑ । याः॑ । उ॒दी॒चीः॑ ।
ता॒भिः॑ । ज॒मद॑ग्निः । याः॑ । ऊ॒र्ध्वाः॑ । ता॒भिः॑ । वि॒श्वक॑र्मेति
वि॒श्व – क॒र्मा॑ । यः॑ । ए॒वम् । ए॒ता॒साम् । ऋ॒द्धिम् । वे॒द ।
ऋ॒ध्नोति॑ । ए॒व । यः॑ । आ॒साम् । ए॒वम् । ब॒न्धुता॑म् । वे॒द ।
ब॒न्धुमा॑निति ब॒न्धु – मा॒न् । भ॒वति॑ । यः॑ । आ॒साम् । ए॒वम् ।
क्लृ॒प्तिम् । वे॒द । क॒ल्पते॑ । 58 (50)

5.2.10.6

ऽस्मै॑ य आ॒सामे॒वमा॑यत॒नं वै॒दाऽऽ*य॑त॒नवान्॑ भ॒वति॑ य आ॒सामे॒वं
प्र॒तिष्ठां॑ वै॒द प्र॒त्ये॒व ति॑ष्ठति प्रा॒णभृ॑त उप॒धाय॑ सँय॒त उप॑ दधाति
प्रा॒णाने॒वा ऽस्मिन्॑ धि॒त्वा सँय॑द्भिः सँय॒च्छति॑ तथ् सँय॒ताꣳ
सँय॑त्त्वमथो प्रा॒ण ए॒वापा॑नं दधाति तस्मात् प्रा॒णापा॑नौ सं च॒रतो॑
वि॒षूची॑रुप दधाति तस्माद्–वि॒ष्वञ्चौ॑ प्रा॒णापा॑नौ यद्वा
अ॒ग्नेर॑सँय॒त– [] 59

5.2.10.6 - Padam

अ॒स्मै । यः । आ॒साम् । ए॒वम् । आ॒य॒त॒न॒मि॒त्या॑ – य॒त॒नम् । वे॒द ।
आ॒य॒त॒न॒वा॒नि॒त्या॒य॒त॒न – वा॒न् । भ॒व॒ति॒ । यः । आ॒साम् । ए॒वम् ।
प्र॒ति॒ष्ठा॒मि॒ति॒ प्र॒ति – स्था॒म् । वे॒द । प्र॒ती॒ति॒ । ए॒व । ति॒ष्ठ॒ति॒ । प्रा॒ण॒भृ॒त॒
इ॒ति॒ प्रा॒ण – भृ॒तः । उ॒प॒धा॒ये॒त्यु॒प – धा॒य । स॒य॒त॒ इति॒ सं – य॒तः ।
उ॒पे॒ति॒ । द॒धा॒ति॒ । प्रा॒णा॒नि॒ति॒ प्र – अ॒ना॒न् । ए॒व । अ॒स्मि॒न् । धि॒त्वा ।
स॒य॒द्भि॒रि॒ति॒ स॒य॒त् – भिः । स॒मि॒ति॒ । य॒च्छ॒ति॒ । तत् । स॒य॒ता॒मि॒ति॒
सं – य॒ता॒म् । स॒य॒त्त्व॒मि॒ति॒ स॒य॒त् – त्वम् । अ॒थो॒ इति॒ । प्रा॒ण
इति॒ प्र – अ॒ने । ए॒व । अ॒पा॒न॒मि॒त्य॒प – अ॒नम् । द॒धा॒ति॒ । तस्मा॑त् ।
प्रा॒णा॒पा॒ना॒वि॒ति॒ प्रा॒ण-अ॒पा॒नौ । स॒मि॒ति॒ । च॒र॒तः । वि॒षू॒चीः । उ॒पे॒ति॒ ।
द॒धा॒ति॒ । तस्मा॑त् । वि॒ष्व॒ञ्चौ । प्रा॒णा॒पा॒ना॒वि॒ति॒ प्रा॒ण-अ॒पा॒नौ । यत् ।
वै । अ॒ग्नेः । अ॒स॒य॒त॒मि॒त्य॒सं – य॒तम् । 59 (50)

5.2.10.7

–म॒सु॒व॒र्ग्य॒म॒स्य॒ तथ् सु॒व॒र्ग्यो॑ऽग्नि॒र्यथ् स॒य॒त॒ उप॒ द॒धा॒ति॒ स॒मे॒वैनं॑
य॒च्छ॒ति॒ सु॒व॒र्ग्य॒मे॒वाक॑-स्त्र्य॒वि॒र्वयः॑ कृ॒त॒म॒या॒ना॒मि॒त्याह॑

वयो॑भिरे॒वायान॑व रुन्धे॑ ऽयैर्वया॒॑सि सर्वतो॑ वायु॒मती॑र्भवन्ति
तस्मा॑दय॒॑ सर्वतः॑ पवते । 60

5.2.10.7 - Padam

असु॑वर्ग्यमित्यसु॑वः – ग्यम् । अस्य॑ । तत् । सु॒वर्ग्य॑ इति
सुवः॑ – ग्यः । अ॒ग्निः । यत् । सँय॑त इति सं – यतः॑ ।
उप॒दधा॑तीत्युप – दधा॑ति । समि॑ति । ए॒व । ए॒नम् । यच्छ॑ति ।
सु॒वर्ग्यमि॑ति सुवः॑ – ग्यम् । ए॒व । अ॒क्रः । त्र्यवि॑रिति
त्रि – अ॒विः । वयः॑ । कृ॒तम् । अ॒याना॑म् । इति॑ । आ॒ह । वयो॑भिरिति
वयः॑ – भिः । ए॒व । अ॒यान् । अवे॑ति । रुन्धे॑ । अ॒यैः । वया॒॑सि ।
सर्व॑तः । वा॒युमती॑रिति वायु – मतीः॑ । भव॑न्ति । तस्मा॑त् । अ॒यम् ।
सर्व॑तः । प॒वते । 60 (35) (प॒श्चा – दै॒ताः – पु॒रो – ऽक्ष॑णया –
कल्प॑ते – ऽसं॑ य॒तं – पञ्च॑त्रि॒ंशच्च॑) (A10)

5.2.11.1

गा॒यत्री॑ त्रि॒ष्टुब् जग॑त्यनु॒ष्टुप् प॒ङ्क्त्या॑ स॒ह ।

बृ॒हत्यु॑ष्णिहा॑ क॒कु॒त् सू॒चीभिः॑ शि॒म्यन्तु॑ त्वा ।

द्वि॒पदा॑ या चतु॑ष्पदा त्रि॒पदा॑ याच॑ षट्प॒दा ।

स॒छन्दा॑ या च वि॒च्छन्दाः॑ सू॒चीभिः॑ शि॒म्यन्तु॑ त्वा ।

म॒हाना॑म्नी रे॒वतयो॑ विश्वा॒ आशाः॑ प्र॒सूव॑रीः ।

मे॒घ्या वि॒द्युतो॑ वाचः॑ सू॒चीभिः॑ शि॒म्यन्तु॑ त्वा ।

रज॒ता हरि॑णीः सी॒सा युजो॑ युज्यन्ते॒ कर्म॑भिः ।

अश्व॑स्य वा॒जिन॑स्त्वचि॒ सू॒चीभिः॑ शि॒म्यन्तु॑ त्वा । नारी॑ – [] 61

5.2.11.1 - Padam

गा॒य॒त्री । त्रि॒ष्टुप् । जग॑ती । अ॒नु॒ष्टु॒गित्य॑नु-स्तुक् । प॒ङ्क्त्या॑ । स॒ह ।

बृ॒हती॑ । उ॒ष्णिहा॑ । क॒कु॒त् । सू॒चीभिः॑ । शि॒म्यन्तु॑ । त्वा । द्वि॒पदे॑ति

द्वि – पदा॑ । या । चतु॑ष्पदेति॒ चतुः॑ – पदा॑ । त्रि॒पदे॑ति त्रि – पदा॑ ।

या । च । षट्प॑देति॒ षट् – पदा॑ । स॒छन्दा॑ इति॒ स – छन्दाः॑ । या ।

च । वि॒च्छन्दा॑ इति॒ वि – छन्दाः॑ । सू॒चीभिः॑ । शि॒म्यन्तु॑ । त्वा ।

म॒हाना॑म्नीरिति॒ महा॑ – नाम्नीः॑ । रे॒वतयः॑ । विश्वाः॑ । आशाः॑ ।

प्र॒सू॒वरी॑रिति॒ प्र – सू॒वरीः॑ । मे॒घ्याः॑ । वि॒द्यु॒त इति॑ वि – द्यु॒तः ।
वाचः॑ । सू॒चीभिः॑ । शि॒म्यन्तु॑ । त्वा । रज॒ताः । हरि॑णीः । सी॒साः ।
युजः॑ । यु॒ज्यन्ते॑ । क॒र्मभि॑रिति॒ कर्म – भिः॑ । अ॒श्वस्य॑ । वा॒जिनः॑ ।
त्वचि॑ । सू॒चीभिः॑ । शि॒म्यन्तु॑ । त्वा । ना॒रीः । 61 (50)

5.2.11.2

–स्ते॑ प॒त्नयो॑ लो॒म वि॑चिन्वन्तु मनी॒षया॑ ।
दे॒वानां॑ प॒त्नीर्दि॑शः सू॒चीभिः॑ शि॒म्यन्तु॑ त्वा ।
कु॒विद॑ङ्ग॒ यव॑मन्तो॒ यवं चि॒द्यथा॑ दा॒न्त्यनु॑पूर्व॒ वियू॑य ।
इ॒हे॒हैषां॑ कृ॒णु॒त भो॑जनानि॒ ये ब॒र्हिषो॑ नमो॒वृक्तिं॑ नज॒ग्मुः । 62

5.2.11.2 - Padam

ते । प॒त्नयः॑ । लो॒म । वी॒ति । चि॒न्वन्तु॑ । मनी॒षया॑ । दो॒वाना॑म् ।
प॒त्नीः॑ । दि॒शः । सू॒चीभिः॑ । शि॒म्यन्तु॑ । त्वा । कु॒वित् । अ॒ङ्ग ।
यव॑मन्त॒ इति॑ यव – मन्तः॑ । यव॑म् । चि॒त् । यथा॑ । दा॒न्ति ।
अ॒नु॒पूर्व॑मित्यनु – पूर्॒वम् । वि॒यूये॑ति वि – यू॒य ।
इ॒हे॒हेती॒ह – इ॒ह । ए॒षाम् । कृ॒णु॒त । भो॑जनानि । ये । ब॒र्हिषः॑ ।

नमो॑वृ॒क्तिमि॒ति नमः॑ – वृ॒क्तिम् । न । जग्मुः॑ । 62 (30)

(नारी॑ – स्त्रि॑श्च॑) (A11)

5.2.12.1

कस्त्वा॑ च्छय॒ति कस्त्वा॑ वि शा॒स्ति कस्ते॑ गात्राणि शि॒म्यति॑ ।
क उ॑ ते शमि॒ता कविः॑ । ऋ॒तव॑स्त ऋ॒तुधा॑ परुः॑ शमि॒तारो॑ वि॒शास॑तु ।
सँव॑त्सरस्य धायसा॑ शिमीभिः शि॒म्यन्तु॑ त्वा ।
दैव्या॑ अध्व॒र्यव॑स्त्वा च्छय॒न्तु वि च॑ शासतु ।
गात्राणि॑ पर्व॒शस्ते॑ शिमाः॑ कृण्वन्तु शि॒म्यन्तः॑ ।
अ॒र्धमा॑साः परू॒षि ते॑ मा॒साः छय॒न्तु शि॒म्यन्तः॑ ।
अ॒होरा॑त्राणि मरु॒तो विलि॑ष्ट – [] 63

5.2.12.1 - Padam

कः । त्वा । छ॒यति॑ । कः । त्वा । वी॒ति । शा॒स्ति । कः । ते ।
गात्राणि॑ । शि॒म्यति॑ । कः । उ । ते । शमि॒ता । कविः॑ । ऋ॒तवः॑ । ते ।
ऋ॒तुधै॑त्य॒तु – धा । परुः॑ । शमि॒तारः॑ । वी॒ति । शा॒सतु॑ ।

सँव॑त्सर॒स्येति॑ सं – व॒त्सर॒स्य॑ । धा॒य॒सा॑ । शि॒मी॒भिः॑ । शि॒म्यन्तु॑ ।
त्वा । दै॒व्याः॑ । अ॒ध्व॒र्य॒वः॑ । त्वा । छ्यन्तु॑ । वी॒ति॑ । च । शा॒स॒तु॑ ।
गा॒त्रा॒णि॑ । प॒र्व॒श इति॑ प॒र्व – शः॑ । ते । शि॒माः॑ । कृ॒ण्वन्तु॑ ।
शि॒म्यन्तः॑ । अ॒र्ध॒मा॒सा इत्य॑र्ध – मा॒साः॑ । प॒रू॒षि॑ । ते । मा॒साः॑ ।
छ्यन्तु॑ । शि॒म्यन्तः॑ । अ॒हो॒रा॒त्रा॒णीत्य॑हः – रा॒त्रा॒णि॑ । म॒रुतः॑ ।
वि॒लि॒ष्ट॒मि॒ति॒ वि – लि॒ष्टम् । 63 (50)

5.2.12.2

सू॒द॒यन्तु॑ ते । पृ॒थि॒वी ते॑ ऽन्त॒रि॒क्षे॒ण वा॒यु॒रि॒च्छि॒द्रं भि॒ष॒ज्य॒तु॑ ।
द्यौ॒स्ते नक्ष॑त्रैः सह रू॒पं कृ॑णोतु सा॒धु॒या ।
शं ते प॒रे॒भ्यो॑ गा॒त्रे॒भ्यः॑ श॒म॒स्त्व॒वरे॑भ्यः ।
श॒म॒स्थ॒भ्यो॑ म॒ज्ज॒भ्यः॑ श॒मु ते त॒नु॒वे॑ भुवत् । 64

5.2.12.2 - Padam

सू॒द॒यन्तु॑ । ते । पृ॒थि॒वी । ते । अ॒न्त॒रि॒क्षे॒ण । वा॒युः । छि॒द्रम् ।
भि॒ष॒ज्य॒तु॑ । द्यौः । ते । नक्ष॑त्रैः । सह । रू॒पम् । कृ॑णोतु । सा॒धु॒या ।
शम् । ते । प॒रे॒भ्यः॑ । गा॒त्रे॒भ्यः॑ । शम् । अ॒स्तु॑ । अ॒वरे॑भ्यः । शम् ।

पद पाठे (वाक्य सहित) – पञ्चमकाण्डे – द्वितीयः प्रश्नः

अ॒स्थ॒भ्य॒ इ॒त्य॒स्थ॒ – भ्यः॑ । म॒ज्ज॒भ्य॒ इति॑ म॒ज्ज॒ – भ्यः॑ । श॒म् । उ॒ ।
ते॒ । त॒नु॒वे॑ । भु॒वत् । 64 (30) (विलि॑ष्टं – त्रि॒ंशच्च॑) (A12)

Prasna Korvai with starting Padams of 1 to 12 Anuvaakams :-

(वि॒ष्णु॒मु॒खा – अ॒न्न॒प॒ते – या॒व॒ती – वि॒ वै – पु॒रु॒ष॒मा॒त्रे॒णा – ऽग्ने॑
तव॑ श्र॒वो॒ वयो॑ – ब्र॒ह्म॒ ज॒ज्ञान॑ – स्व॒य॒मा॒तृ॒ण्णा – मे॒षां॑ वै – प॒शु
– गा॒य॒त्री – क॒स्त्वा – द्वा॒द॒श)

Korvai with starting Padams of 1, 11, 21 Series of Panchaatis :-

(वि॒ष्णु॒मु॒खा – अ॒प॒चि॒ति॒मा॒न् – वि॒ वा ए॒ता – व॒ग्ने॑ तव॑ –
स्व॒य॒मा॒तृ॒ण्णां – वि॒षू॒ची॒ना॒नि – गा॒य॒त्री – च॒तु॒ष्प॒ष्टिः)

First and Last Padam of Second Prasnam of 5th Kandam

(वि॒ष्णु॒मु॒खा – स्त॒नु॒वे॑ भु॒वत्)

॥ हरिः॑ ओं ॥

॥ कृष्ण॑ यजुर्वेदीय तैत्तिरीय संहितायां पद पाठे

पञ्चमकाण्डे द्वितीयः प्रश्नः समाप्तः ॥

Details of Panchati and Padam for Kandan 5 – Prasanam 2 – TS 5.2

	Panchati	Padams
Anuvakam 1	7	342
Anuvakam 2	6	292
Anuvakam 3	7	347
Anuvakam 4	4	198
Anuvakam 5	6	325
Anuvakam 6	5	270
Anuvakam 7	5	255
Anuvakam 8	7	377
Anuvakam 9	6	294
Anuvakam 10	7	335
Anuvakam 11	2	80
Anuvakam 12	2	80
Total →	64	3195

Notes:

1. Please refer to the book “TS Kandan 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in